

Lomu

Polo'a Kolini kumate maineno mani avona kae-malegeno nago a'mo agia Fipi'e Lomu kumate alino momamine. Yisasi'a faliteno hetino ikapinaga haitegeno Polo'a tueti fo'a (24) kafu agava maineno Lomu kea kae-malene.

Polo'a Aposolo ali'yama'amo aepa'ahe humane.

¹ Nagaya Polo'nae Yisasi Kalaisi ali'ya kano'a maine'na Aposolo mainogeno Anumaya Koti'a muki'a vayapiti “Alu aotage kano maineka nagaila kanale mono ke'nia huhaleka hamapaiyo.” huno hunatene.

² Ani kanale mono kea Anumaya Koti'a nayona “Kamigahue.” huno hulokiya vaige'ya agai aune vaya'mo'ya huhale'ya Anumaya Kotina alu aotage auta'ma'afi kae-malenayane. ³ Ani kanale kea agai'a Nafa'nemofe humane. Ani Nafa'nemo'a velafa maisiafe Teviti nofi vayapiti falote humane. ⁴ Falote huteno falimainefiti Anumaya Koti'a tokiya'aleti alihetimaineafe Alu Aotage Avamu'mo'a “Ma kanoa tokiya'a hanegenon Anumaya Kotina Nafa'ne'la maine. Yisasi Kalaisi'a Anumayatimo maine.”

⁵ Mainege'ya agai agima alisaga hisayafe muki'a kotega vea'mo'ya Yisasife havi'ya amakupi male'ya amametiti hu'ya agai kema ali hipo'ya hisayafe Anumaya Koti'a Yisasi ayapitila kayone yana namiteno “Aposolo kano maiyo.” huno

hunatene. ⁶Hunatenegi muki'a kumate vea'nene tamakai'ene Lomu mainaya vea'nene Yisasi Kalaisi anaga maisayafe ago hapali-lamatene.

⁷ Anumaya Koti'a hau ayamopafi haigeno hapali-lamategetama alu aotage vea'nea Lomua mainae. Anumaya Koti'a, Nelafa'ene Yisasi Kalaisi'a, Anumayatimo'ene kayone hisaya ya'ene tamaipa falu lamahaisia ya'ene tamamisa'e.

Polo'a Lomu kumate vea'ne amakegahe humaine.

⁸ Hagote'na ma yafe tamahapaigahue. Muki'a ma mopale vea'mo'ya tamakaifena “Yisasife havi'ya amakupi male'ya amametiti humainaya vea'ne mainae.” hu'ya lamakaifena hage'na havimainoa yafena aluya hu'na lamakaifena Yisasi Kalaisi hulatenea yateti Anumaya Koti'nimotega musena nehue. ⁹ Anumaya

Koti ali'yama aluana naya mukiki hu'na agai'a Nafa'nemo hulatenea yafe kanale mono kea hamanepaugeno Anumaya Koti'a nagemaineanagi'na muki'a kanafina nunamu hu'na tamakai tamakia aye'na havinegoe.

¹⁰ Notamakoafe menima tamakaitega visuafene hu'na havinegoe “Kagaika visua yafema kahainageka kana valinato.” hu'na havinegoe.

¹¹ Tamaku'amo'a tokiya'age huno maisia tokiya, Alu Aotage Avamu'mo'a tamaminegi nago'a tokiyaene alisayafe tamaya hisue hu'na tamakai'ma tamakesua yafena tusiya huno nenahaiye. ¹² Mage nehue “Yisasife

havitama lamakupi maletama tamametiti nehaya yatamimo¹a nagaila naya hisige¹na nagaya ani¹a hu¹na nagupima malenoa yanimo¹a tamakaila tamaya hisie.” hu¹na nehue.

¹³ Nafu¹naganagatama ma yafe haviho nagayama Yuta vea¹ne omainaya veapina Yisasifena kanale mono kea hamapauge¹ya ali¹ya amakupi malageno alaga¹a ayeno falote humainea kavala tamakaipi “Ani¹a hisue.” hu¹na muki¹a kanalela tamakaitega ugahe nehuanagi nago¹a yamo kani¹a maleno tilege¹na o¹unoe.
¹⁴⁻¹⁵ Anumaya Koti¹a ali¹ya alige¹na muki¹a vea¹mogamina kanale hu¹ya nemaiya vea¹nene, afa vea¹nene, avoma nehapaliya vea¹nene, avoma nohapaliya vea¹nene “Yisasifena kanale mono kea hamapaiyo.” huno hunateneafene hu¹na tamakaitega, Lomu mainaya veate, me lamahapaisuafe nagu¹amo¹a he¹nelie.

Yisasina kanale mono ke¹a Anumaya Kotina tokiya¹ae.

¹⁶ Yisasi kanale mono kehena nagayea nohue. Ani kefi Anumaya Kotina kasago¹ya tokiya yama¹a hanege¹ya muki¹a ani kema havi¹ya amakupi male¹ya amametiti humainaya vea¹mogamina Anumaya Koti¹a amaku amamena aligatigahie. Yuta* anagala hagoteno amaku amamena aligatiteno haenaga Yuta vea¹ne omainaya vea¹mogamina aligatigahie.
¹⁷ Ani kemo¹a mage huno tavenelie Yisasife havi¹ya amakupi male¹ya amametiti humainaya

vea'mo'ya kefo yana humainayanagi Anumaya Koti aulagafina fatago vea'ne mainae. Ani yafena Anumaya Koti auta'mafina mage huno humaineane

“Fatago vea'ne mainae huno humatenea vea'mo'ya Anumaya Kotife havi'ya amakupi male'ya amametiti humainaya yateti mai kanale hu'ya maigahae.” hu'ya kae-malenayane

Muki'a vea'mo'ya Anumaya Kotina amakave'no hutena.

¹⁸ Muki'a vea'mo'ya Anumaya Kotina amakave'no hutaya kava hu'ya kefo yama hayafe kelamage kemona falaki-malenageno Anumaya Koti'a ikapinagati haima vaiya yama'a lavenelie. ¹⁹ Anumaya Koti'a muki'a vea'mogami amakusafinaga agaifema havisaya yana ago amaveli-mainae. ²⁰ Anumaya Koti'a ma mopama talo humalenea kanaleti aepa heno talo humalenea yateti agaila o'agesuna alu aotage au'ava yama'aene agola maige maige hisuna tokiya'aene amavelige'ya agelama hu'ya age-mainayanagi “No'agona yafe nehane.” hu'ya hisaya kana'amia omaleneafe Anumaya Koti'a anona'amia amamigahie.

²¹ Amakaya Anumaya Kotina agemaine'yagi agia alisaga nehu'ya “Kanale yana tamine.” hu'ya agaila musena hu o'ate'ya afa amaku amakesale maine'ya aneginagi haya amaku amakesamo'a hani yapi mainae. ²² Maine'ya “Kanale tagu tagesaene vea'ne mainone.”

hu'ya nehayanagi aneginagi hu'ya mainae.
²³ Maine'ya agola maige maige tokiya hale yama'a hanea Anumaya Koti agia alisaga ohu'ya amakave'no hutete'ya aiyahae hu'ya faligahe humainaya vefi, namafi, kala yagafi, osifa'vefi, amamena amayateti talo hu'ya malene'ya ani yate “Anumayati maine.” hu'ya amakia alisaga humainae.

Vea'mo'ya alu'a lu'a kefo kava mai'ya humainae.

²⁴ Na'a kava mai'ya haya yafe Anumaya Koti'a amatalege'ya amaku amakesafinaga age hama'ye hu'ya havigu havagu amakesamo amavayu hig'e'ya kefo yama'age tokae'ya nehu'ya amakai'ami amaugafa ali haviya humainae. ²⁵ Anumaya Koti kelamage kea amakave'no hutete'ya havige'age ke nehavi'ya Anumaya Koti'ma talo humalenea yate “Anumayati maine.” hu'ya muse-kase nehu'ya amakia alisaga humainagi ani ya'yagama talo humalenea Anumaya Kotina amakave'no hutena. Muki'a yupa agola Anumaya Koti agia alisaga hisuna kano maine. Tamage.

²⁶ Anumayamona amakave'no hutaya yafe Anumaya Koti'a amatalege'ya tusi amakaye hisifa kava hu'ya age hama'ye haya kavala humainae. A'ne'amimo'ya anau'amimo'yaene humo kavala ne'atale'ya amafalu'yaene havi kava'yaga humainae. ²⁷ Nehage'ya vemo'yaenena a'amienama humo kavala ne'amatale'ya amaipafiti atamo'a hetige'ya

nago¹a ve amafalu¹yaene amaugafa age hama¹ye hu¹ya amakaye hisifa kavala humainayafe anona¹amia amakai¹ami amaugafale alimainae.

²⁸ “Anumaya Koti¹a afa kano maineanagita agaifena ohavigahune.” hu¹ya haya yateti Anumaya Koti¹a amatalege¹ya kefo amaku amakesa havi¹ya ase ohu kavala humainae.

²⁹ Muki¹a kefo yana alu kava alu kavala humainae. Moli hulite¹ya nehu¹ya kumai he yane. Alu vaya¹mogami yate age hama¹ye hu yane. Vaya¹amihe hu-haviya humate yane. Alu kanomo hia kavafe age hama¹ye nehaya yane. Vaya hamae¹ya falimate yane. Vaya¹amimo¹yaene tusi ke ne¹vaiya yane. Havige¹age savale kavale. Vaya¹amimofe “Na¹a kava nehae.” hu¹ya huatifi mafi nehae.

³⁰ Vaya amakia alihaviya nehae. Anumaya Kotina kame hune¹atae. Veganokano hu¹ya halakae halakau ke nehu¹ya amakai¹ami amaugafa ali¹ya hait¹ya amakai¹ami amaki alisaga humainae. Haegafa kefo kavala ali¹ya falote nehu¹ya ita¹afo¹amimo kea hefala¹negiye.

³¹ Aneginagi nehu¹ya “Na¹a hugahune.” hu¹ya haya kea ne¹atalae. Nago¹amogamifena amahau amayamopafina ohamaige¹ya hamauna hu no¹amatae.

³² Anumaya Koti¹a “Na¹a yama nehaya veala anona¹amia amamisuge¹ya alite¹ya agola faligahae.” huno humainea kea ani vea¹moya haviline¹yagi ani kefo yana mai¹ya nehu¹ya na¹a yama¹agelomagi kefo yama haya vea¹mogami amakia alisaga nehu¹ya kefo yama

haya yafena muse hu ne'amatae.

2

*Anumaya Koti'a kaiyekema humatesiana fa-
tago huno humategahie.*

¹ Kefo yama nehaya yafena nago¹a veafena “Lamakaya na¹a kava nehae.” hutama nehutama amakaila fako hu ne'amatagi tamakai¹enena ani¹a kefo kavala nehageno tamakai¹enena tamakaya nehie. Tamakaya kaiyeke humataya veamogatama ani¹a kefo yana ago humainayafe kenonama hisaya kea omalene. ² Tagaya ago havimainone Anumaya Koti'a kelamage keleti kefo yama humainaya vea'mogamina kaiyekea fako humateteno anona¹amia alitagifeno ne'amamie. ³ Ne'amamianagi hana¹a tamakesa nehaviye tamakaya ani¹a kefo yana nehaya vea'mogamife “Tamakaya na¹a kava nehae.” hutama nehutama ani kefo yana nehayanagi “Anumaya Koti'a kaiyeke hulamateteno anona¹a alitagifeno otamigahie.” hutama nehao? A¹ao kefo yana ago humainaya anona¹a tamamigahie. ⁴ Ifi Anumaya Koti'a tusiya huno kayone yama¹a tamamiteno aupa¹a kaiyekea hu notamategi aya¹ayate tamakava maime ne¹uno kefo yama haya yafena anona¹a aupa¹a alitagifeno notamamigetama “Ani kefo yana afa ya kana yane.” hutama tamakesa nehaviyo? Havige nehagi kefo yatamihena tamaku¹a aiyahae hutama “Nago¹ene ohugahune.” hutama hisayafene huno Anumaya Koti'a kayone

hulamateno kaiyekema huotamatea yafena nohaviyo? ⁵ Kagu'amo'a tusiya huno tokiya'age humainegeka “Kefo yani'ahena nagu'a aiyahae ohugahue.” hukama nehana yafena Anumaya Koti'a kagaila haima vai negatea yana hala'ya humaleneanagino kaiyekema humatesia yupa agai'a fatago huno fako hulamateteno tamaveligahie. ⁶ Anumaya Koti'a muki'a vea'mo'yama humainaya yateti anona'amia alitagifeno amamigahie. ⁷ Nago'a vea'mo'ya “Anumaya Koti'a muse huno tagia alisaga hisigeta tokiya'aene hale yapi maisune.” hu'ya kanale kava huge huge nehaya vea'mogamina Anumaya Koti'a agola maige maige hisaya hamaimula amamigahie. ⁸ Amamigahianagi nago'a vea'mo'ya amakai'ami amaugafaheke'ya amakesa nehavi'ya kelamage kemona akave omale'ya kefo yamo au'ava kava akave nemalageno Anumaya Koti'a tusiya huno haiya vaimateteno amakata aisia yana amamigahie. ⁹ Nago'a vea'mo'ya kefo kava mai'ya huge huge nehaya yafe Anumaya Koti'a tusi kana ya'ene amaugafa amagata aisia yamo'ene amakaila alino aiso humategahie. Hagoteno Yuta vea'mogami amamiteno anileti Yuta vea'ne omainaya vea'nenena amamigahie. ¹⁰ Amamigahianagi fatago kava'ma nehaya vea'nea Anumaya Koti'a halemainea tokiya'aene ala amakiene amaipamo'a falu hisia ya'ene amamigahie. Hagoteno Yuta vea'mogami amamiteno anileti Yuta vea omainaya

vea'nenena amamigahie. ¹¹ Anumaya Koti'a muki'a veafena nagoke agu agesale maineno ne'amamie.

¹² Muki'a vea'nea kahegi kema hamaopaige'ya ohavine'ya kefo yama mai'ya humainesayana Anumaya Koti'a ani kahegi keletila kaiyekea hu o'amategahigi fako hinage'ya hanimo agu'afi agola amakata aisia no maigahae. Muki'a vea'nea kahegi kema haviline'ya kefo yama nehaya vea'nea Anumaya Koti'a agai'a kahegi keleti kaiyekea alino aye fako humategahie. ¹³ Nago'a vea'mo'ya kahegi kema havite'ya ago'ma atalenesaya veafena Anumaya Koti'a "Fatago vea'ne mainae." huno hu no'amategi kahegi kema akave nemalesaya veafe Anumaya Koti'a "Fatago vea'ne mainae." huno humategahie. ¹⁴ Yuta vea'ne omainaya vea'mo'ya Anumaya Koti' kahegi kea amakaipina omale-
neanagi amakai'ami amaku amakesafima hanea kema akave malayana akave malenaya kemo'a amakai'ami amaku amakesafiti ani kahegi kea ali falote humainae. ¹⁵ Anumaya Koti'a agai'a kahegi kema amaku'afima kae-malenea kea amavelige'ya amaku amakesamo'a nago'ma hia kanafina "Havi kava nehane." huno kaiyekea hu ne'amateno nago'ma hia kanafina "Kanale kava nehane." huno humaineanagino tagu'afina ago kae-malegeno haneagino tavenelie. ¹⁶ Nagaya Yisasi'ma hulatenea kanale mono kema nehua kefiti ma kea hane, ma mopama ha'no hisia yupa Anumaya Koti'a Yisasi Kalaisi avayafitila

muki'a vea'mo'ya falaki'ya humainesaya yafena kaiyekea humateteno fako humategahie.

Yuta vaya'mo'ya mage humainae “Kahegi kemo taya hugahie.” hu'ya havigea humainae.

¹⁷ Kagaya “Yuta kano mainoe. Mosese kahegi kea havi'na akave nemaloanagino naya hugahie.” huka kagaika'a kagi alisaga nehuka “Anumaya Koti nafa'ne mainoe.” huka nehano? ¹⁸ Kahegi kea ago huge kavelige hageka havilinanafe “Anumaya Kotima nehaiya kavafena havite'na fatago au'ava yana ago havilino kano mainoe.” huka nehano? ¹⁹ Kagaya ma kagesa nehavine “Kahegi kemo aepa'a havilinogi aulaga asu humai kanomo visia kana aveligahue. Hani yapi mainaya veala ayevasa humategahue.” huka nehano? ²⁰ “Kahegi kemo aepa'a havilinoafe nago'a kema ohavinaya vea'mogami'ene osi osi nafa'neyagaene humaveli hamaveli hugahue.” huka nehano? ²¹ Alu vea'nea humave-nelinanagi na'a higeka kagaika'ahena ave notine? “Musufa yana ohiho.” huka huhaleka veala hamanepainanagi kagaika'a musufa yana nehano? ²² “Kumai he yana ohiho.” huka veala hamanepainanagi kagaika'a ani kumaiya nehano? Ago falimainaya veafe “Anumayati maine.” hu'ya amakisana ne'vaiya yafena “Onahautafa huno onahaiye.” huka nehananagi ani vea'mogami mono nopitila musufa yana nehano? ²³ Kagia alisaga nehuka “Kahegi kea havimainoe.” huka nehananagi ani kea ago alitagae-mainanafe Anumaya Koti agia

ali haviya nehano? ²⁴ E, Anumaya Koti kema kae-malenaya auta'mafina Yuta vea'mogatihena mage hu'ya humainayane “Tamakaitamia havi kava'ma nehaya yatamihena Yuta vea omainaya vea'mo'ya tamakete'ya Anumaya Koti agihena kamuge hatage'ya vai ne'atae.” huno humaine.

Amaugafa taga nehaya yana afa ya kana humaine.

²⁵ Kahegi kema akave malesayana Yuta vaya'mo'ya humainaya kava hu'ya amakoya ano'ya laga hu yamo'a* tamaya hugahianagi kahegi kema alitama atagaesayana tamaugafa taga nehaya yana afa ya kana yane. ²⁶ Amakoya ano'ya taga ohunaya vayala Yuta vea omainaya vea'mo'ya kahegi kemo akave malesayana Anumaya Koti'a ani veafena mage huno hugahie “Nagai'ni nafa'neyaga maine'ya amaugafa laga humalenaya vava kana humainae.” huno humategahie. ²⁷ Kahegi kea akave maletama tamaugafa laga nehagi ani kahegi kema ali ne'atagaetama nago'a vava'mo'ya, amaugafa laga ohunaya Yuta vea omainaya vea'mo'ya, kahegi kema havi'ya akave male'ya tamakaila tamakase'ya kanale kava nehaya yamo'a “Havi kava nehae.” huno hulamategahie. ²⁸⁻²⁹ Ta'yafigae Anumaya Koti vea'nea, Yuta veala, tama vea'ne mainae? Amegati amaugafa'age taga humalenayafe Anumaya Koti veala omainagi Anumaya Kotina amaku'ama amitafa humainayafe Yuta vea'nelafa mainae. Ani veala kahegi kema akave malenayafe

amakai'ami amaugafa taga ohunagi Alu Aotage Avamu'mo'a amakupi emaineno haegafa amaku amakesa amamige'ya mainae. Ve'a'mo'ya na'ama humainesaya ve'a'mogami amakia alisaga ohugahagi Anumaya Koti'a agai'age amakia alisaga hugahie.

3

Kefo yamo'a kanale kavala o'agasegahie.

¹ Yuta ve'a'mo'ya hana'a hu'ya Yuta vea omainaya veala amakase-mainaya vea'ne mainae? Amaugafa laga hu yamo'a na kanale ya amamine? ² Tamage Yuta ve'a'mo'ya kanale yana kasago'ya alimainae. Hagoteno Anumaya Koti'a humainea kema kae-malenaya kea amayapi malene. ³ Maleneanagi nago'a ve'a'mo'ya havi'ya amakupi male'ya amametiti ohunaya yateti Anumaya Koti'a “Hulokiya vaimalenoa yana muki'a ve'a'mogamina o'amamigahue.” huno hugahifi? ⁴ A'ao ani'a ohugahie. Muki'a ve'a'mo'ya havige'age vea'ne mainesayana Anumaya Koti'a tamage'age kano maine. Anumaya Koti avopina mage hu'ya kae-malenayane

“Anumaya Kotiga humalenana kemo'a 'Fatago kano mainane.’ huno hugatene. Kaiyekema hugatele'asina amakasate'asine.” hu'ya kae-malenayane.

⁵ Tagaiti kefo yatimo'ma Anumayamo fatago au'ava kava'ma avelisigeta na'ane hugahune? Anumaya Koti'a kefo kava humainona yateti

anona¹a haima ne¹vaiya yama¹a lamiana “Fatago ohia kava nehie.” huta hisuno? Nani kea ohisune. Muki¹a vea¹mo¹ya nehaya ke nehue. ⁶ Fatago ohunea kavala nohie. Fatago kava¹ma ohisiana hana¹a huno ma mopale vea¹mogatina kaiyekea hulategahie?

⁷ Nagaya havigema nehua yateti Anumaya Koti kelamagemo au¹ava yana amave-lisige¹ya agima alisaga hisayana na¹a hinageno Anumaya Koti¹a nagaifena “Kefo kava nehana kano mainane.” huno hunenate? ⁸ Na¹ama hisiana “Kanale yama falote hisia yafena kefo ya hige-tao.” huta hisuno. A¹ao, nago¹a vea¹mo¹ya havige hu¹ya nagaife “Mani kea humane.” hu¹ya havi¹ya haviya-hunatenae. Mani kema humainaya vea¹mogamina Anumaya Koti¹a kaiyeke humateteno haima ne¹vaiya yana amamigahie.

Nagola fatago kanoa omaitafa huno omaine.

⁹ Na¹ane hisune? Tagaya Yuta vea¹mogata nago¹a veala ago amakase-mainono? A¹ao, tamage hu¹na tamahapauve tagaya muki¹a veala Yuta vea¹nene Yuta vea omainaya vea¹nene kefo kava nehuna yamo alino aikagilatene. ¹⁰ Anumaya Koti auta¹mafina mage hu¹ya kaemalenayane

“Fatago kanoa omaitafa huno omaine. ¹¹ Nago kanomo¹a Anumaya Kotina aepa¹a ohavine. Nago kanomo¹a Anumaya Kotifena atia no¹aye. ¹² Ago atale¹ya kefo kavake¹ya humainaya veake¹ya mainagi nagokela fatago kanoa omaitafa

huno omaine. ¹³ Amavayafitila vaya komufiti'ma hia kava huno hi'mana'age nehie. Amavefu'namo'a havige'age nehuno ani amavaya agu'afinaga osifa'vemo'a vaya'ma amahaege'ya nefaliya augafa tina anifinaga hane. ¹⁴ Kamuge vai ya'ene atu'age ke ne'vaiya ya'ene amavayafina havate-maine. ¹⁵ Amaiyaye'ya veala hamaesage'ya falisaya yategage'ya age nemalae. ¹⁶ Muki'a vea ali'ya haviya nehu'ya havi no maisaya yama'age ne'amamiye. ¹⁷ Amaipa falu hu'ya nagoke amaku amakesale akave malesaya yafena nohamaiye. ¹⁸ Anumaya Kotifena amama'yoa ai'ya kolia nohae." hu'ya kae-malenayane.

¹⁹ Tagaya havunageno'a Anumaya Koti kahegi kemo'a ani kahegi kemo aiyafi mainaya vea'mogamife humaine. Ani yafe nago kanomo'a "Nagaya kanale hu'na fatago kano mainoe." huno ohisie. Na'afenomagi muki'a ma mopale vea'mogata Anumaya Koti aulagafina kefo kavake'ya nehuna vea'ne mainonafe kaiyekea hulateno anona'a tamigahie. ²⁰ Anumaya Koti kema akave malenea yateti Anumaya Koti'a nago kanomofena "Fatago kano mainane." huno hu o'ategahie. Kahegi kemo'a nagoke yama'age tavenelie. "Kefo kava nehae." huno tavenelie.

Kalaisifema havino agupi malenesia

kanomofena Anumaya Koti'a "Fatago kano mainane." huno hutegahie.

²¹ Menia Anumaya Koti aulagafina fatago vea'ne maisuna yana ago tahapaigeta nehavune. Kahegi kema akave malenaya yateti ani yana falote ohunegi alu kateti falote humaineanagino Mosese'ene Anumaya Koti amaune vaya'mo'yaene kae-malenaya kemo'a anima kanale ya huta fatago kava'ma hisunafe tahapaimainae. ²² Anima fatago huta maisuna kavala ma'a humaine, nago kanomo'a Yisasi Kalaisi hulatenea yafe havino agupi maleno ametiti humainesia yateti Anumaya Koti'a "Fatago kano mainane." huno hutene. Alu kana omalene. ²³ Muki'a vea'mogata kefo kava'age'ya nehunanagita Anumaya Kotina haisia kava hisuna tokiyatia kosa he-otateneanagita ikapinaga ohaigahune. ²⁴ Ohaigahunagi kefo yatimo'a tagaila aikagilateneanagi Yisasi Kalaisi'a tagaila lavayu hisia miyana atalesiafene huno me faligeno Anumaya Koti'a agai'a kayone yama'aleti "Fatago vea'ne mainae." huno hulatene. ²⁵ Tagaya kefo yama huna yafena Anumaya Koti'a aipa haviya hulateno vea amaulagafi "Yisasiga faligane." huno hutegenome falitegenome kolama'amo'a elavimainea yafema havita tagupi maleta tametiti hunageno Anumaya Koti'a aigetatenome kefo yatia atalelatene. Anumaya Koti'a nayona kefo yama humainaya veala amakata aisia yana anona'amia aupa'a o'amaminegi Yisasi

Kalaisina hutegeno me falimainea yateti Anumaya Koti'a agai'a fatago kava'ima hia yana taveli-maine. ²⁶ Menia ma mopafi mainona kanafina agai'a fatago kavake'yama nehia yana tavelisiafe Yisasina hutegeno me falimaineafe muki'a Yisasi'ma hulatenea yafema havi'ya amakupi male'ya amametiti humainaya vea'mo'ya kefo kavala humainayanagi Anumaya Koti'a "Fatago vea'ne mainae." huno hune'amate.

²⁷ Na'a humainegi tagaiti lagima alisaga hisuna kaana hanate hane? Omaletafa huno omalene. Muki'a kahegi kema akave nemalona yateti tagia alisaga hisuno? A'ao, tagaiti kanale kava huna yateti Anumaya Koti'a "Fatago vea'ne mainae." huno huotatenegi Yisasi'a hulatenea yafe havita tagupi maleta tametiti huna yateti hunelate. Ani lagima alisaga hisuna kaana omalene. ²⁸ Tagaya mage nehune Yisasi'a hulatenea yafe havita lagupi maleta tametiti humainona yateti Anumaya Koti'a "Fatago vea'ne mainae." huno hulategahie huta nehune. Kahegi kema akave malesuna yateti hu oategahigi Yisasi'a hulatenea yafema havita tagupi malona yatetike'ya ani kea hulategahie. ²⁹ Hana'a humaine? Anumaya Koti'a Yuta vea'mogami Anumaya Kotike'ya maineo? Ifi Yuta vea omainaya vea'mogami'ene Anumaya Koti'ami maineo? A'ao, muki'a veala Yuta vea'nene Yuta vea omainaya vea'nene Anumaya Koti'a Anumaya'ami maine. ³⁰ Anumaya Koti'a nagoke agai'age maineafe Yuta vea'mo'ya

Yisasi¹ma hulatenea yafema havi¹ya amakupi male¹ya amametiti humainaya yateti Anumaya Koti¹a “Fatago vea¹ne mainae.” huno humateno Yuta vea omainaya vea¹nene Yisasi¹a hulatenea yafema havi¹ya amakupi male¹ya amametiti humainaya yateti Anumaya Koti¹a “Fatago vea¹ne mainae.” huno humatene. ³¹ Ani kea ago humainonafe Yisasife havita lagupi malenona yateti “Anumaya Koti kahegi kemo¹a afa ya kana ke hane.” huta nehuno? A¹ao na¹a ohutafa humainonagi kahegi kemona ali hetita ali lokiya ne¹vaune.

4

Anumaya Koti¹a Apalahamufena “Fatago kano mainane.” huno hutene.

¹ Apalahamu¹a Yuta vea¹mogati taginagomofena na¹ane hisune? ² Apalahamu¹a agai¹a ali¹yateti muki¹a kahegi kemona akave maleneafe Anumaya Koti¹a “Fatago kano mainane.” huno hile¹asina Apalahamu¹a agai¹a agia alisaga hile¹asinagi Anumaya Koti aufina na¹a kavala ohune. ³ Anumaya Koti auta¹mafina mage huno kae-malenayane

“Anumaya Koti¹a Apalahamufena ‘Na¹a hugategahue.’ huno hulokiya vai-malenea kehena ‘Lamage hanafe ani¹a hunategane.’ huno agupi maleno ametiti hiafe Anumaya Koti¹a mage huno hutene ‘Fatago kano mainane.’ huno huteneane.” hu¹ya kae-malenayane.

4 Vea'mo'ya ali'ya ne'aliya yateti miyama alinu'yahena ani miyafena “Afa'a muse ya nelamie.” hu'ya nohagi “Ali'ya alimainona anona'a ne'alune.” hu'ya nehae. ⁵ Nago kanomo'ma “Kahegi kema muki'a kanale'ma akave malesuafe Anumaya Koti'a 'Fatago kano mainane.' huno hunategahie.” huno'ma ohisiana “Anumaya Koti'a agai'age kefo kava nehia kanomofena 'Fatago kano mainane.' huno hutenea kanomo'a nagaila 'Fatago kano mainane.' huno hunategahie.” huno ametiti humaineafe Anumaya Koti'a anima agupi maleno ametiti humainea yana ageteno “Fatago kano mainane.” huno hune'ate. ⁶ Yuta vea'mogatina taginagomo'a, Teviti'a, mage humaine nago'a vea'mo'ya kahegi kea akave omale'ya Anumaya Kotife havi'ya amakupi malesayana Anumaya Koti'a amakaifena “Fatago vea'ne mainae.” huno humatesia vea'mo'ya tusi'a muse hugahae. ⁷ Teviti'a amakaifena mage huno Anumaya Koti avopina humaineane

“Vea'mogatama kefo kava'ma haya kavala Anumaya Koti'a ago aigetamateno atalelmateneafe muse hiho. Kefo yama haya kavala ago ayeha'mi-taleneafe muse hiho. ⁸ Anumayamo'a nago kanomo humainea kefo yafena havino o'amino age kanitesiana ani kanomo'a muse hugahie.” huno humaineane.

⁹ Amaugafa laga humainaya Yuta vayafeke'ya ani musena hisae huno nehio? A'ao, amaugafa

laga ohunesaya vea'nene ani'a hu'ya musena hugahae. Apalahamufe tagesa havisune. Anumaya Koti'a Apalahamufena "Na'a kavala hugategahue." huno hulokiya vaimalenea kekena "Tamage hananagika ani'a hunategane." huno agupi maleno ametiti humainea yateti Anumaya Koti'a "Fatago kano mainane." huno hutene. ¹⁰ Apalahamu'a hana'a huno mainegenon Anumaya Koti'a "Fatago kano mainane." huno hutene? Agoya ano'ya laga hutegenon huteneo? A'ao, laga ohunea kanafi ani kea huteneane. ¹¹ Hagoteno augafa laga ohuneno Anumaya Koti kea havino agupi maleno ametitia humainea yateti Anumaya Koti'a "Fatago kanoa mainane." huno'ma hutenea yafema vea'mo'ya havisaya yafe augafa laga humaine. Ani yafe muki'amo'ya amaugafa laga ohune'ya Apalahamu'ma humainea kava hu'ya Anumaya Kotife havi'ya amakupi male'ya amametiti humainaya yateti "Fatago vea'ne mainae." huno humatenesia vea'mo'ya Apalahamuna aginagomo'ya mainae. ¹² Mainagi nago'a vea'mo'ya amaugafa laga humainayanagi ani kavake'yama ohayana Apalahamu'ma augafa laga ohunea kanafima humainea kava hu'ya Anumaya Kotife havi'ya amakupi malenaya kava'ene humainaya vea'mogami toto'amimo maine.

Anumaya Koti'a hulokiya vaimalenea kemo'a agai'fema havi'ya amakupi malenaya veafeke humaine.

13 Anumaya Koti'a Apalahamu'ene aginagomo'enefe mage huno humaineane "Muki'a ma mopagefa kava yagaisayafe tamamigahue." huno hulokiya vaimalene. "Kahegi kemona akave maletesage'na tamamigahue." huno ohunegi "Tamakaya Anumaya Kotife havitama lamakupi malage'na 'Fatago vea'ni mainae.' hu'na hulamatoafe tamamigahue." huno humaineane. 14 Kahegi kema akave nemalaya vea'mo'ya alile'asina havi'ya amakupi nemalaya yamo'a afa ya kana higeno hulokiya vai-malenea kemo'a falote ohile'asine. 15 Kahegi kemo'a Anumaya Kotina hai vaigeno anona'a nelamianagi kahegi kema omale'sina "Ago ali ne'atagaune." hu'ya ohale'asine.

16 Anumaya Koti'a hulokiya vai-malenea kemo'a kayone nehia yama'aleti falote hisiafe'ene muki'a Apalahamuna aginagomo'ya alisaya yafe'ene "Agaife havi'ya amakupi male'ya amametiti humainaya yateti aligahae." huno humaine. Kahegi kema akave nemalaya vea'mo'yage o'aligahagi taginagomo'a, Apalahamu'ma, ametiti humainea kava hisuna vea'mogatina Apalahamu'a ne'alafa maine. 17 Mage hu'ya Apalahamufena kae-malenayane "Kagaya muki'a kotega vea'mogamina toto'amimoga maigane." hu'ya kae-malenayane.

Apalahamu'a Anumaya Kotife havino agupi maleno ametiti humaineafe Anumaya Koti aula-

galela tototimo maine. Anumaya Koti'a fali-mainaya veala eteno hamaimula ne'amamino falote ohunea yamofena "Falote huo." huno higeno falote humainea kano maine.

Apalahamu'a kanale'ya huno Anumaya Kotifena havino agupi malene.

¹⁸ Apalahamu'a ani kekena havino ametitia hianagi nafa'nema atesia kana'amo'a ago ha'no humainea yafena agesa ohavinegi "Muki'a kotega vea'mogamina toto'amimoga maigane." huno humainea kele ametiti humaine. ¹⁹ Ani kanafina Apalahamu'a vani hataleti'a (100) kafu ago ha'no hutegenoko kolamo'a ago hau higeno nafa'ne atesia tokiya'a omalegeno a'amo'enena namo a mainea yafena tole agesa ohavinegi tokiya'age huno Anumaya Kotife havino agupi maleno ametitia humaine. ²⁰ Anumaya Koti'a "Hugategahue." huno humainea kekena "Namisio onamisio?" huno tole agesa ohavinegi Anumaya Koti agia alisaga nehuno havino agupi maleno ametiti hia yamo'a alakefa humaine. ²¹ "Hugategahue huno humainea yana namigahie." huno agesa havilama humaine. ²² Na'a humaineafe Anumaya Koti'a "Fatago kanoa mainane." huno hutene. ²³⁻²⁴ "Anumaya Koti'a 'Fatago kanoa mainane.' huno hutene." huno kae-malenea kea agai'agefeke' yana ohunegi tagai'enefe mani kea humaineane. Tagaya "Anumaya Koti'a Yisasi Kalaisina falimainefiti alino hetitenea kano maine." huta havita lagupi maleta tametiti hunageno "Fatago

vea'nea mainae.” huno hulatene. ²⁵ Anumaya Koti'a Yisasina kefo yatia ayeha'mi-alesiafe hutegeno me falimaine. Faliteno tagaifena “Fatago vea'ne'ni'ae.” huno hulatenea kemona tokiya'age huno hanesiafe Anumaya Koti'a Yisasina fali-mainefitila ali hetitene.

5

Anumaya Koti'a tagaifena “Fatago vea'ne mainae.” huno hulatene.

¹ Tagaya Yisasi'a hulatenea yafema havita tagupi maleta tametiti humainonafe Anumaya Koti'a “Fatago vea'ne mainae.” huno hulatene. Anumayatimo'a, Yisasi Kalaisi, ani kavala hulate-neafe Anumaya Koti tokiya hale yapi maigahune. ² Yisasi Kalaisi'a agai'a hulatenea yateti ka valilategeta Anumaya Kotina kayone yama'afi umaineta Anumaya Kotina tokiya hale yama'afi mo lokaeta maisunafe tametitia huta musena nehune. ³ Ani yafekela musena nohunagi kana yapiti tokiya vaisuna yatimo'a falote hisiafene huta kana yama va'yi hiana ani yafena muse nehune. ⁴ Tokiya vaisuna yatimo'ma hane-sigeno'a Anumaya Koti'a muse hulatesia au'ava yatimo'a falote hisigeno Anumaya Koti'a tagu tamena aligatisiafe tametitia nehuta agava mainone. ⁵ Anumaya Koti'a Alu Aotage Avamula ago tamigeno lagupi mainegeni ani Avamuteti aluya huno hau ayamopafi nehaiya yana tamineafe tametiti hisuna yana afa ya kana ohugahigi taya hugahie.

⁶ Nayona tagayama kanale kava hisuna amukotima omalenea kanafina, Anumaya Koti¹ma malenea kanafina, Kalaisi¹a tagayama kefo yama nehuna vea¹mogatilefene huno me falimaine. ⁷ Nago kanomo¹a fatago kanomona aya hisuafene huno ofalile¹asine. Tamage nagoke kanomo¹a kayone¹age kanomona aya hisuafene huno falile¹asino? ⁸ Ohavinonagi tagaya kefo kavake¹ya huta maunageno Kalaisi¹a tagaifene huno me falimainea yateti Anumaya Koti¹a tagaifena hau ayamopafi nehaiya yana taveli-maine. ⁹ Agai¹a kolama¹aleti kefo yama humainona anonatia aligeno Anumaya Koti¹a “Fatago vea¹ne mainae.” huno hulalteteno nago¹ene taya huno kefo yama nehuna yana Anumaya Koti¹a hai vaino anonatia tamigahe hianagi Yisasi¹ma falimainea yateti tagai anona ago alimaineafe tagu tamena aligatigahie. ¹⁰ Tagaya Anumaya Kotina kame huteta mainona kanafina agai¹a nafa¹nemo falimainea yateti Anumaya Koti¹a “Afa¹a maiho.” huno ali falu hulategeta nagoke taipale maineta Anumaya Koti¹ene taipamo¹a falu higeta mainonageno Yisasi¹a fali-mainefiti heti-mainea haimu¹aene maineanagino nago¹ene taya huno tagu tamena aligatigahie. ¹¹ Nagi nago yana Anumayatimo¹a, Yisasi Kalaisi¹ma hulatenea yafena Anumaya Kotife aluya huta musena nehune. Yisasi Kalaisi¹a ago lavaleno Anumaya Koti¹ene nagopi ailokaelategeta nagoke taipale mainone.

Atamu¹a fali yana ali falote humaineanagi

Yisasi'a haimu alisaya yana ali falote humaine.

¹² Atamu'a, nagoke kanomo, kefo yana higeno ani kefo yama humainea yamo'a ma mopafina falote hutegeno kefo yama humainea kumi'amo'a haneafe vea'ma fali yana alifalote higeno muki'a vea'mo'ya kefo yama hayafe anona'amia fali yamo'a muki'a veapina emaine. ¹³ Kahegi kemo'a omenegeno kefo yana haneanagino kahegi kema omalekina Anumaya Koti'a nagoke nagoke'mogati kefo yatihena ohavisine. ¹⁴ Atamu mainea kanaleti aepa he'ya veala falimainae. Falime falime u'ya Mosese mainea kanafina ani'a hu'ya muki'a falimainae. Nago'a vea'mo'ya Atamu'ma atagae-mainea kava hu'ya o'atagaenayanagi afa'a falimainae. Haenagama esia kanoa Yisasi Kalaisi amema'a kana huno Atamu'a taveli-mainae.

¹⁵ Atamu'ma humainea kefo ya'ene Anumaya Koti'a kayone hulatenea yamo'ene nago avamete ohunegi alu'a lu'a humaina'e. Tamage nagoke kanomo'a kefo yama humainea yateti muki'a veala nefaliyanagi Anumaya Koti'a tusi ya huno kayone yama'afiti nagoke kanoa, Yisasi Kalaisi'a, kanale yama hulatenea yana afa'a lamigeno tusiya huno fali yamona agaseno kasago'ya veala ali kayone humatene. ¹⁶ Anumaya Koti'a kayone hulatenea ya'ene Atamu'a kefo yama humainea anona'aenena nago avamete ohunegi alu'a lu'a humaina'e. Nagoke kanomo'a kefo kava'ma humaineafe Anumaya Koti'a muki'a vea'mogamina kaiyekea humateteno “Hanimo

agu'afi agola tamakata aisia no maigahae.” huno humateneanagi kasago'ya vea'mo'ya kasago'ya kefo yana humainayanagi kayone humatenea vea'mogamina “Fatago vea'ne.” huno humatene. ¹⁷ Tamage nagoke kanomo kefo yana humainea yateti faliyamo'a falote humaineanagi'ya muki'a vea'mo'ya nefaliyanagi nagoke kanomo'a, Yisasi Kalaisi, hulatenea yateti kasago'ya vea'mo'ya Yisasi'a kanale ya huno kayone hulatenea yafema havi'ya amakupi malaya vea'mogamife Anumaya Koti'a “Fatago vea'ne mainae.” huno hu-matesige'ya agola maige maige hisaya hamaimula alite'ya Kalaisi'a hulatenea yateti tokiya vai'ya maigahae.

¹⁸ Na'a humaineafe nagoke kanomo kefo yana humainea yateti muki'a vea'mogamina Anumaya Koti'a kaiyekea humateteno “Hanimo agu'afi agola tamakata aisia no maigahae.” huno hulateanagi nagoke kanomo fatago kava hu-maleneafe Anumaya Koti'a agaiife havino ne'amino kasago'ya vea'mogamifena “Fatago vea'ne mainae.” huno humatenea yateti agola maige maige hisaya hamaimula ago alimainae. ¹⁹ Nago kanoa, Atamu'e, Anumaya Koti kea akave omaleafe muki'a vea'mo'ya kefo yama'lagela nehaya vea'ne mainagi nagoke kanomo'a, Yisasi'a, Anumaya Koti kea akave maleneafe Anumaya Koti'a kasago'ya vea'mogamifena “Fatago vea'ne mainae.” huno humategahie.

²⁰ Hu-mategahianagi Anumaya Koti'a kahegi kema amamiana tusiya hu'ya alitagae-mainae.

Kefo yama haya yamo'a alakefa hianagi Anumaya Koti'a kayone hulatenea yamo'a ani kefo yamona agaseno tusi'a yakefa hane. ²¹ Kefo yama humainaya anona'a muki'a vea'nea nefaliyanagi kayone hulatenea yama'a tusiya huno haneafe Anumayatimo'a, Yisasi Kalaisi falimainea yateti Anumaya Koti'a kayone hulateno “Fatago vea'nea mainae.” huno hulateteno agola maige maige hisuna tahaimula lamine.

6

Tagaya Kalaisi'ene ailokaeta faliteta agai'ene fali-mainopiti ago heti-mainone.

¹ Tagaya na ke hugahune? Tagaya kefo yama hisunageno'a Anumaya Koti'a kayone hisuna yama'a tagaipina ala huno havatelatesie huta hisuno? ² Na kea ohutafa huta ohisune. Kefo kava nehuna yana ago ataleta falimainea augafa vea'ne mainone. Falimainaya vea'mo'ya kefo yana ohugahae. ³ Yisasi Kalaisi'ene alino tategeta aiga'maeta agai'ene falimainage'ya tima falelatenaya kea ohavinao? ⁴ Tamage tima falelatenaya yamo'a Yisasi Kalaisi'ene aiga'maeta agai'ene falunageno komufina hevailategeno Nelafa'a tokiya hale yama'aleti Kalaisina komufitila alino hetitenea kava huno tagai'enena ali hetilateteno haegafa tahaimula tamigeta alimainonafe kanale'ya huta haegafa au'ava yapi vaiyesune.

Tagaya Kalaisi'ene ailokaeta eteta tahaimula alita mainone.

⁵ Tagaya agai'ene aiga'maeta agayama humainea kava huta faliteta ani'a huta agai'ene aiga'maeta fali-mainefiti hetimainea kava huta hetigahune. ⁶ Tagaya havimainone kefo yamo tokiya ago fali ha'no hisiafe nayoma nehavuna atafa lagu tagesa Yisasi Kalaisi'ene aiga'maeno yafaga yosale ago fali-maineanagita tagaya kefo yamo ali'ya vea'ne nago'ene omaisune. ⁷ Fali-mainesia kanomona kefo yamo'a nago'ene atafa ohugahie. Hai falimaine. ⁸ Tagaya Kalaisi'ene aiga'maeta fali-mainesunana ani'a huta agai'ene fali-mainesupitila hetita maigahune huta tagupi havita malenone. ⁹ Tagaya ago nehavune Yisasi Kalaisi'a fali-mainefiti ago hetimaineafe nago'ene eteno ofaligahie. Fali yamo'a tokiya'a omaletafa huno omaleneafe kava yagai o'ategahie. ¹⁰ Nagoke yupa kano'a kefo yamo tokiya hegaseno fali-maineneafe nago'ene eteno ofaligahie. Haegafa haimu alino Anumaya Kotina haiya kava hisiafe maine. ¹¹ Na'a humaineafe tamakai'enena ani lamakesa havi havi hutama maiho, “Kalaisi falimainea avamete nagaya ago fali-mainoanagino kefo yamo tokiyamo'a nago'ene kava huonategahie. Yisasi Kalaisi'ene aiga'mae'na Anumaya Kotina haisia kava hisue.” hutama hiho.

¹² Na yafe kefo yamo'a “Ala kavatami mainoe.” huno falisia tamaugafamo'a “Age ha'ye hisia kava huo.” huno kava o'yagaisie.

¹³ Kefo kava hisaya yafena tamaiya, tamayana,

tamaulaga, kefo yamote ali'yafena tamaku'a o'amiho. Muki'a Anumaya Kotina agai'age amiho. Tamakaya falimainafiti hetimainaya vea'ne mainagi tamaugafamo'a muki'a kanale au'ava yama alisiafe Anumaya Kotina amiho. ¹⁴ Tamakaya kahegi kemo'a tamaku tamamena aligatisiafe tamametitia nohagi "Anumaya Koti'a kayone hulateteno ago aligati-maine." hutama nehae. Ani yafe kefo yamo'a tamakaila "Na kava hiho." huno ala kavatamia omaitafa huno omaisie.

Tagaya fatago au'ava yamo ali'ya vea'ne maisune.

¹⁵ Tagaya na'ane hugahune? Kahegi kemo akave malesune huta tametitia nohunagi Anumaya Koti'a kayone hulatenea yafe havita tametitia nehuta kefo yana kanalelagita hisuno? Ani'a ohutafa huta ohugahune. ¹⁶ Tamakaya ohavinao? Nago kanoma muki'a lamaku tamakesa hakitama amitetama agai avaya ali hipo'ya hutama maisayana ani kanomo ali'ya vea'a maigahae. Kefo yama hu yamo ali'ya vea'nema mainutamahena ani kefo yama nehaya anona'a alitetama falitama agola Anumaya Koti'enena omaile'asinagi tamakaya Anumaya Koti kea akave male yamo ali'ya vea'nema mainutamahena ani kema akave malaya anona'a alisageno Anumaya Koti'a "Fatago vea'ne mainae." huno hulamategahie. ¹⁷ Tamage nayona tamakaya kefo yamo ali'ya vea'ne mainageno Anumaya Koti kea huhalagetama havilama hutama ago akave

malenae. Na¹a humainayafe Anumaya Kotina musena hune¹atone. ¹⁸ Kefo yamo¹ma nofi hulamatenea yapitila Anumaya Koti¹a ago alino kalu helamategetama fatago yamo ali¹ya vea¹ne mainae. ¹⁹ Kema havi yatamimo¹a yaufa akavi ohuneafene hu¹na vea¹mogata tagu tagesafiti nehuna kea tamahanepaugi haviho hagotetama tamaiya, tamayana, muki¹a yatamia “Kefo yamo ali¹ya nafa¹ne maiho.” hutama hu-mainayanagi menia tamaiya, tamayana, muki¹a yatamia fatago hisia yamo ali¹yate aminutamahena Anumaya Kotina alu aotage vea¹ne¹a maigahae.

²⁰ Hagotetama kefo yamo ali¹ya vea¹ne¹a mainetama fatago kavala ohisaya tamakesa havimainayane. ²¹ Kefo yamo ali¹ya vea¹ne mainetama ani kavala humainayafe anonatamia hana augafa kanale ya alimainae? Menia ani yafena tamakaye hisifa yama¹age hanegi anona¹a kanale yana o¹alinae. Ago falitetama Anumaya Koti¹enena omaisaya yama¹age ali falote humainae. ²² Kefo yamo¹ma nofi hulamatenea yapitila menia Anumaya Koti¹a ago alino kalu helamateteno “Ali¹ya vea¹nimogatama maiho.” huno higetama mainageno ani ali¹yamo anona¹a “Tamakaya alu aotage vea¹ne¹ni¹a agola maige maige hisaya tamahaimula aligahae.” huno humaine. ²³ Kefo yamo ali¹ya vea¹mo¹ya anona¹amima alisaya yana fali yane. Faligahagi Anumaya Koti¹a nagola muse yana afa¹a nelamie. Anumayatimo¹a Yisasi Kalaisi¹ene ailokaeta mainonafe agola maige maige hisuna tahaimula

ago tamine.

7

Menia yaufa tagu tagesale vaiyesuna yafe humaine.

¹ Nafu'naganagatama, kahegi kema havilama hulinaya vea'ne, tamahanepauve vea'ma ofali'ya afa'a mainaya kanafina kahegi kea akave male'ya aiya'afinaga mainagi falisayana ani kemo aiya'afinaga omaigahae. Ani yafena lamakaya havimainafi ohavinae?
² Nagola avame kea tamahapaigahugi haviho. Nago a'mo'a vele mainesigeno'a kahegi kemo'a neve'ene kino anatafa hulisige'ana mainesa'anageno neve'ma falisigeno'a kino'ma anatafa hulige'ana nemai'a kemo'a nago'ene atafa hulino omaigahianagi afa'a alu velela maigahie. ³ Neve'ma ofalino afa'a mainesigeno'ma alu vele visiana ani a'mofena “Kumai a mainane.” hu'ya hugahagi neve'ma ago falisigeno'a kahegi kemo'a nofi'ma kitenea yana ago kalu hemaineafe nago kanoma alisiana “Kumai he a mainane.” hu'ya ohugahae. ⁴ Nafu'naganagatama hagotetama kahegi kemote tamametitia humainagi Kalaisi augafaene ailokaetama Kalaisi'ene falimainayafe kahegi kemona ago ataletama Anumaya Kotite kanale au'ava ya alitama falote hisayafe alu kanomo'ene, faliteno komufiti ago eteno heti-mainea kanomo'ene, ailokaetama mainae. ⁵ Hagoteta tagaya atafa lagu tagesaene

mainonageno kahegi kemo'a "Na'a kavala ohiho." huno higeta ageta laha'ye hisuna kefo tagu tagesa alino helafigeno muki'a taugafamo'a ani'a huno kefo yama hiafe fali yama'agela ali falote humaine. ⁶ Humaineanagi meni kanafina tagaya Kalaisi'ene falunageno tatafama hulinea kahegi kea ago alino kalu hetalegeta menia haegafa lagu tagesa Alu Aotage Avamuteti Anumayamo kea akave nemalone. Nayoma hanea avopima kae-malenaya kahegi kemo akave'ma malenona augafa kavala nohune.

Kefo yamo'a veala alino haviya nelahaiye.

⁷ Na'ane hisuno? "Kahegi kemo'a havi yane." huta hisuno? Na'a ohutafa huta ohugahune. Kahegi kemo'a kefo yama nave'otile'asina "Kefo yana nehue." hu'na ohavule'asine. Ani kemo'a "Alu kanomo yatela ageka kaha'yea ohuo." huno ohile'asina nagaya alu kanomo yatela age'na naha'yema nehua yafena nagayea ohile'asine. ⁸ Kahegi kemo'a kefo kavala naveligeno kefo kavala falote huno muki'a age naha'yema hua yana nagu'afi falote nehie. Kahegi kema omalele'asina kefo ya'mo'a fali-mainea augufa kava hige'na kefo yafena nagayea ohule'asine. ⁹⁻¹⁰ Hagote'na kahegi kema ohavinoa kanafina afa'a mainoanagi kahegi kema falote hige'na agete'na "Kefo yana nehuafe faligahue." hu'na humainoane. "Tamahaimu tamamigahue." huno humainea kahegi kemo'a eteno kefo yama humainoafe naha'ge'na falimainoe. ¹¹ Kahegi kemo'a "Na'a kavala ohuo."

huno hige¹na havuanagi ani kefo yamo¹a ayenavataga hige¹na ani kefo yama humainoafe nahaege¹na fali-mainoe.

¹² Kahegi kemo¹a alu aotage ke, tusiya huno fatago humainea ke¹age hane. ¹³ Haneanagi ani kanale yamo¹a nagaila nahaege¹na falimainofi? Na¹a ohutafa huno ohunegi kefo yamo¹a ani kanale keleti nagaila nahaege¹na falimainoe. Kefo yamo¹a fufu yate efalote hutegenoa kahegi kemo¹a “Tusi¹a havi kefo ya hane.” huno aepa¹a navelige¹na agete¹na “Tamage ani kefo yana ase ohu yane.” hu¹na nehue.

Kefo yamo¹a tagu tagesamona alino nofi hune¹ate.

¹⁴ Tagaya ago nehavune Anumaya Koti¹a kahegi kea ago tamineanagi nagaya mopale kanoa atafa nagu nagesaene kano mainogeno kefo yamo¹a nofi hunatege¹na agai ali¹ya ne¹alue. ¹⁵ Nagayama nehua yamo aepa¹a ohavinoe. “Nenahaiya yama hisue.” hu¹na hua yana nohuanagi “Onahaiya yane.” hu¹na hua yama¹age muki¹a kanafina mai¹na nehue. ¹⁶ “Onahaiye.” hu¹nama hua kavala huge huge mai¹na nehue “Kahegi kemo¹a fatago humainea ke hane.” hu¹na nehue. ¹⁷ Menia ago havilinoe nagai¹ni¹a ani kavala mai¹na nohugi kefo yamo¹a nagupi maineno ani kavala nehie. ¹⁸ Nagaya havuana atafa naipafina nago kanale yana omalege¹na “Kanale kava hisua yafena nenahaiye.” hu¹na nehuanagi ani kanale kavala hisua tokiya¹nia omalene. ¹⁹ “Nahaiya kanale kavala hugahue.” hu¹na

nehuanagi ani kavala nohugi kefo yafema “Onahaiye.” hu'na nehua yama'age mai'na nehue. ²⁰ “Onahaiyema.” hu'na hua yafema hisuana ani kavala nakai'ni'a nohugi kefo yama nagupima hanea yamo ani kavala nehie.

²¹ Ani'a nehige'na mani'a augafa kava'ma huana nagaya “Kanale kavake'ya hisue.” hu'na huanagi kefo yamo'a nagaipina hanege'na mai'na nehue. ²² Nagu'amo'a Anumaya Koti haiya kavafena nehaiye. ²³ Nehaigeno'agi naulaga, nagesa, nayamo'a muki'a naugafamo'a kefo yama hisaya amakesa hute'ya nagupima haneno Anumaya Kotifema nehaiya nagu nagesaene tu nehu'ya naugafamona kefo yamo'ya avale'ya nofipi ha'yagi'ya atete'ya “Tagai ke havio.” hu'ya nehae. ²⁴ Avo'neo kefo kava nehua kano mainoe. Falisua naugafale mainoanagino hana kanomo naugafa alino katigahie? ²⁵ Anumayati Yisasi Kalaisi'a nagu namena ago aligati-mainae Anumaya Kotifena aluya hu'na musena hune'atoe. Nagai'ni'a nagu nagesafiti Anumaya Kotina haiya kavala akave nemaloanagi atafa naipamo'a kefo yamo akave nemale.

8

Kalaisi'a kefo yatia aline'ataleno Alu Aotage Avamu tamine.

¹ Yisasi Kalaisi'ene ailokaeta mainona vea'mogata Anumaya Koti'a nagola kaiyekea hulateno kefo yama humainona anona'a otamigahie. ² Kefo yama hu'na falisua yamo

nofipi mainogeno Yisasi Kalaisi'a falimainea yateti haimu hanea Alu Aotage Avamu'mo tokiyaleti ali kalu heno natalene. ³ Kahegi kemo'a "Fatago vea'ne mainae." huno hulatesia tokiya'a atafa tagu tagesamo'a ani kahegi kea akave malesia tokiyamo'a omalegeno ani kahegi kemo'a tagaila alino kanale kavala hu otategahigi Anumaya Koti'a nafa'ne'a hutegeni tagaya kefo vea'mogata mauna augafa avamete augafa kalimai kano emainegeni tagayama kefo yama humainona yateti tagata aisia yana anonatia Yisasina amigeno alino faligeno Anumaya Koti'a kefo yatimo tokiya'a alitalene. ⁴ Alitalegeta menia tagaya atafa lagu tagesalela tahanepaiya kavala huta vaino'ayonagi Alu Aotage Avamu'mo tahapaiya kava huta vaiyatete nehuta kahegi kemo fatago au'ava ya huta kaana vaine'ayone. ⁵ Vea'mo'ya atafa amaku amakesale'ma vaiyayana amaugafa age hama'ye hisaya yate amakesa havi havi hu'ya ani katega ne'vayanagi nago'a vea'mo'ya Alu Aotage Avamu'mo'a "Vaiyeho." huno hia kate vaiyatetema hayana Alu Aotage Avamu'mona haiya amakesa havi havi hu'ya mainae. ⁶ Vea'mo'ya atafa amaku amakesale amaugafa age hamaha'ye hisayana faligahagi vea'mo'ya Alu Aotage Avamu'mo haisia yafema amakesa havi havi hisayana amaipamo'a falu hige'ya agola maige maige hisaya hamaimula alimainae. ⁷ Atafa amaku amakesale amaugafa age hama'ye hisaya vea'mo'ya Anumaya Kotina kame tagi'ya

kaene'ate'ya Anumaya Koti kahegi kemona akave omale'ya ani kea akave malesaya tokiya'amia omaletafa huno omalene.

⁸⁻⁹ Vea'mo'ya atafa amaku amakesa akave malesayana Anumaya Kotima haiya kavala ohale'asinagi tamakaya atafa tamaku tamakesa akave nomalagi Alu Aotage Avamu'mo'a tamakupi maineafe agai kea akave nemalae. Nago'a vea'mo'ya Kalaisina Alu Aotage Avamu'amo'ma amakupinaga omainesiana Kalaisi nafa'nea omainae. ¹⁰ Kefo yama humainayafe tamaugafamo'a ago falimainegi Kalaisi'a tamakupi mainenageno Anumaya Koti'a "Fatago vea'ne mainae." huno hulamateneafe tamaku tamamemo'a agola maige maige huno maine. ¹¹ Anumaya Koti'a, Yisasina fali-mainefiti ali hetitenea kanomo, Avamu'mo'a tamakai tamakupima mainesiana Yisasi Kalaisina fali-mainefiti ali hetitenea kanomo'a tamakupi mainea Avamuteti manima falisaya tamaugafa ali hetilamateno tamahaimula tamamigahie.

Alu Aotage Avamu'mo kema akave male-sunana Anumaya Koti nafa'ne mainone.

¹² Nafu'naganagatama Yisasi'a hulatenea yafena anona'a amisuna yana hane. Atafa lagu tagesamo'a kanale yana huotateneanagino agaila amisuna anona'a omaleanagita atafa lagu tagesa akave maleta taugafamo'a age ha'ye hisia kavala ohisune. ¹³ A'ao atafa lamaku tamakesale'ma vaiyesayana faligahagi

Alu Aotage Avamu'mo tokiyaleti tamaugafa age ha'ye hisia yama hae falisayana agola maige maige hisaya tamahaimu'ene maigahae. ¹⁴ Anumaya Koti Avamu'mo kema akave male'ya vaiyayana Anumaya Koti nafa'neyaga mainae. ¹⁵ Alu Aotage Avamu'mo'a etetama koli hisaya nofipina hulamatesiafe tamakupina omenegi tamakaila “Anumaya Koti nafa'neyaga maiho.” huno hulamatesiafe tamakupi emainegetama Anumaya Kotife “Tatao, Nelafao.” hutama nehae. ¹⁶ Nehageno Alu Aotage Avamu'mo'a agai'a “Tamakaya Anumaya Koti nafa'ne mainae.” huno lagupina tahanepaiye. ¹⁷ Tahapaigeta tagaya Anumaya Koti nafa'nema mainonana Nelafa yana Kalaisi'ene tagai yatafa hapaegahie. He Kalaisi'ene kana yama alisunana ani'a huta agai'ene tokiya hale'yama'aene ala agiene aligahune.

Haenaga'a ikapinaga kanale no maisuna yana aligahune.

¹⁸ Nagaya nagesa havuana haenagama Anumaya Koti'a tokiya hale yama'a fufu yate ali falote hinageno tavelisigeta agesuna yafe tagesa haviteta “Meni kanafima tagata aiya yama ne'aluna yana afa ya kana humaine.” huta hugahune. ¹⁹ Muki'a Anumaya Koti'ma talo humalenea yana agesaga hu'ya Anumaya Koti nafa'nemo'ya falote hisige'ya agesaya yafe ageke hu'ya agava mainae. ²⁰ Muki'a Anumaya Koti talo humalenea yana kasali'ya haviya nehae. Amakaya hamaiya yateti ani kavala

nohagi Anumaya Koti'a "Haenaga'a kanale yama falote hugahie." huno agai'a anima kasalisaya nofipina humatege'ya mainae. ²¹ Mainagi haenaga'a Anumaya Koti'a kasalino haviya hisia nofipima mainaya yana ali-talesigeta tagaya, Anumaya Koti anaga'mogatina, nofipiti tavayu hinageta ali-mainona tokiya hale yapi tagima hanea yana aligahune. ²² Tagaya ago nehavune meni kanafina muki'a Anumaya Koti talo humalenea yamo'ya amakatama aiyana a'nemo'ya nafa'nema ategahe hageno inamu yama alimatea augafa kava hu'ya hume hume hai'ya meni kanafina ne'ae. ²³ Ne'agi amakai'amigela ani kavala nohagi Anumaya Koti'a tagaifena "Haenaga'a muki'a yama tamamigahue." huno hagoteno Alu Aotage Avamula ago tamigeta avale-mainonanagi ani'a huta tagupi "Avo'nio." huta kasalisia taugafa aligatisigeno haegafa taugafa falote hisigeno Anumaya Koti'a agai'a "Nafa'neyaga'ni mainae." huno hulatesiafe tametitita nehuta agava mainone. ²⁴ Anumaya Koti'a tagu tamema aligati-mainea kanafina mage huno humaine "Tamaugafa aligatisuafe tamametiti hutama nagava maiho." huno higeta agava mainone. Nagola vea'mo'ya ago'ma alimainaya yafena agava ohugahae. ²⁵ O'agenona yama "Aligahune." huta tametitilafama hisunana tamena malelava huta agava maigahune.

²⁶ Maigahunanagi fulu fulu vea'ne mainonafe "Na'afe Anumayamotega nunamuna huta havigesune?" huta nehunanagi Alu Aotage

Avamu'mo'a "Vaeha." huno ohavunama'a kea Anumayamotega taya huno havinege. ²⁷ Nehigeno Anumaya Koti'a vea'mogatina tagu'afima hanea yana agelama huno ne'ageno Alu Aotage Avamu'mona agu agesafima hanea ya'ene agemaine. Ani Avamu'mo'a Anumaya Kotima haiya yafena ago haviteno Yisasi anagala amaya hugahe nunamuna huno havinege.

²⁸ Tagaya ago havimainone Anumaya Kotife hamau amayamopafi nehamaiya vea'mo'ya, Anumaya Kotina agai'ma haisia kava hisayafe ke huno agai'alega amavaleno amatenea vea'mogamite, muki'a falote hisia yana kanale ya'ene kana ya'ene Anumaya Koti'a alino kanale hune'amate. ²⁹ Anumaya Koti'a nayona ago amaketeno hapalimatenea veala agai'a nafa'nemo avamete vea'ne maisae huno amatege'ya muki'a veala mainagi Kalaisina nafa'ne'a hagoteno* ategeno "Ala nepu'amimo maisiafene." huno hutene.

³⁰ Anima hapalimatenea veafena ke huno agai'alega amateteno kefo yama'age nehaya vea'ne mainagi Yisasi humatenea yateti "Fatago vea'ne mainae." huno humateteno tokiya hale yama'a amamine.

Nago yamo'a Anumaya Kotima nehaiya yama'a tile'o'ategahie.

³¹ Na'a humaineafe tagaya na'ane huta hisune? Anumaya Koti'a tagai'ma laya hisiana ta tagaila kamea hulategahie? ³² Anumaya Koti'a "Nafa'ne'nia otamamigahue." ohutafa

huno ohunegi afa¹a lagaife huno hutegenomaineanagino muki¹a yama laya hisia ya¹ene tamigahie. ³³ Anumaya Koti¹ma hapali-malenea vea¹nea ta kaiyekea humategahie? Anumaya Koti¹a agai¹a “Ago fatago vea¹ne mainae.” huno hulatene. ³⁴ Hana kanomo kaiyekea hulateno “Tagata aisia yana aligahae.” huno hulategahie? Yisasi Kalaisi¹a faliteno hetino haino Anumaya Kotina tamaga ayatega maineno taya hisia yafena Nefatega ke huno nunamupiti havinegeafe nago kanomo¹a kaiyekea hulateno ali haviyana huotategahie. ³⁵ Kalaisi¹a tagaifena tusiya huno hau ayamopafi nehaiya yama¹a ta tahafalegahie? Tagaya kana yapi maisunano tusi lagata aisia yapino, vea¹mo¹ya havi kava¹ma hulatesaya yapino, kafu kana falote hisigeno tagatesia yapino, muki¹a yatima omalesia yapino, nago¹a havi kava¹mo tagaila alino haviya hisia yapino, tahaesageta falisuna yama falote hisia yapino? Ani ya¹yaga hau ayamopafi nehaiya yana alino tahaofalegahanagino Kalaisi¹a tagaifema hau ayamopafi nehaiya yama¹amo¹a hanege hanege huno hanegahie. ³⁶ Anima havi ya¹yagama falote hisia yafena Anumaya Koti auta¹mafina mage hu¹ya kae-malenayane

“Kagai nafa¹neyaga mainonafe muki¹a yagefina tagaila tahae¹ya fali ha¹no nehae. Tagaya sipi sipi afu kana huta mainonage¹ya tagaifena ‘Hamaesuna vea¹ne mainae.’ hu¹ya nehae.” hu¹ya kae-malenayane.

³⁷ Muki¹a mani havi ya¹yagahema

“Aote'yama'ae.” huta hisune. Kalaisi'a tagaifema hau ayamopafi haumainea kanomo tokiyaleti muki'a ani ya'yaga amakaseta mainone. ³⁸ Nagaya ani yafena havilama hu'na nagupi malenoe. Anumaya Koti'a tagaifena hau ayamopafi nehaiya yana nago yamo'a tahaofalegahie. Falisunano, mainesunano, ensole vayalo, Satani Avamulo, menima hanea yano, haenagama falote hisia yano Anumaya Koti'a tagaifema hau ayamopafi nehaiya yana tahaofaletafa hugahae. ³⁹ Ikate yano mopamona afete hanea yano nago'a muki'a Anumaya Koti talo humalenea yano Anumaya Kotina hau ayamopafima nehaiya yama'a tahaofaletafa hugahae. Anumayatimo'a Yisasi Kalaisi hulatenea yateti agai'ene ailokaeta mainonafe Anumaya Koti'a lagaifena hau ayamopafi agola hauge hauge huno nehaiye.

9

Polo'a Isaleli veafe havino hau humatene.

¹ Kalaisi'ene aiga'mae'na mainoafe tamagelafa nehue. Havige nohue. Alu Aotage Avamu'mo'a nagupi mainege'na nagu'aleti tamage nehue. ² Yuta anaga'nimo'ya Yisasi kea ohaviya'yafe muki'a kanafina naipamo'a kana'age nehuno nagata ne'aiye. ³ Nagoke nofi anaga'nimo'ya amaku'a aiyahae hu'ya Yisasi ke havisayafe Anumayamotega ke hu'na havigesugeno “Hai vainateno natalenege'na hani yapi nagaila nenateka ani veala amavalesane.” hu'na

havigesua nagesa nehavue. ⁴ Nagai nofi anagala Isaleli vea'nea Anumaya Kotina nafa'neyaga'a mainageno Anumaya Koti'a agai'a tokiya hale yama'a amaveliteno alino hagelafi-matenea kea humateteno kahegi kea amamino agai agima alisaga hisaya ali'yana amamino “Ma'a yama hulamategahue.” huno hulokiya vaimalenea kea hamapai-maine. ⁵ Ani nofipiti tokiya'age taginagomo'ya falote humainayanagino Kalaisi'a Anumaya Koti'ma tamaugafa aligatigahie huno hutenea kanoa ani taginagomo'yafiti velafa maisiafe falote humaine. Kalaisi'a muki'a yana kava yagaino Anumaya Koti maineanagita muki'a kanafina agola agia alisaga hisune. Tamage.

Anumaya Koti'a agai'a vea'ne maisaya yafe hapalimatene.

⁶ Anumaya Koti'ma hulokiya vaimalenea kemo'a falote huno afa ya kana nehie hu'na nehue? A'ao na kea nohugi Isaleli veafe tamage nehue muki'a ani vea'mo'ya Anumaya Kotina nafa'neyaga'a omainae. ⁷ Muki'a Apalahamuna aginagomo'ya nafa'neyaga'a omaitafa hu'ya omainagi nayona Anumaya Koti'a Apalahamufena mage higeno auta'mafina kae-maleneane “Kagaika nafa'nemo'a Aisaki'ma atesia nafa'neyaga kagai kaginagomo'ya maitafa hu'ya maigahae.” huno humaineane. ⁸ Ani kemo aepa'a mage humaine muki'a vealavemo'ya nehaya kavateti Apalahamu'ma

atenea nafa'neyaga Anumaya Koti nafa'neyaga omainagi Anumaya Koti'a hulokiya vaimalenea kele'ma amametiti humainaya veafe “Apalahamuna nafa'neyaga'a mainae.” huno humateneane. ⁹ Anima hulokiya vaimalenea kemo'a mage huno humaine “Nagayama malenoa kanamo'ma efalote hisigeno'a Sela'a ne nafa'ne ategahie.” huno humaineane. ¹⁰⁻¹² Ani yama'agefeno-magi taginagomo'a Aisaki'a ko huteno a'ama Lepekana alitenegeno aipa yama hiana kuyave nafa'nelata aipafina kanale yano havi yano hu'ana ohuna'a kanafinagino Anumaya Koti'ma humaineana agai'a haiya yateti veala hapalilatenea kava huno Anumaya Koti'a mage huno ita'animofena hapaiye “Yage nafa'nekamo'a haenaga nafa'nekamo ali'ya kano maineno akave malegahie.” huno humaineane. Ani yamofena mage huno humaine Anumaya Koti'a veala kanale kava'ma humainayafene huno ohapaligahianagino haisia kanomofe ke hinageno agaitega egahie. ¹³ Anumaya Koti auta'mafina mage huno humaineane “Yekopu'a nahau nayamopafi nahaiya kanogi Iso'a onahaiya kano maine.” huno humaineane. ¹⁴ Na'a hu-maineanagita na'ane huta hisune? “Anumaya Koti'a fatago ohia kava humaine.” huta hisuno? A'ao na'a kea ohutafa huta ohugahune. ¹⁵ Mosesefena mage huno humaineane “Nago kano'hema 'Nahau hute'na kalagi aitegahue.' hu'nama hisua kanomona kalagila aitegahue.”

huno humaineane. ¹⁶ Na'a humaineafe Anumaya Koti'a kalagi aisia yana vea'mo'ya "Namisie namisie." hu'ya nehu'ya vea'mo'ya "Nayamufa ai'na ali'ya alisuafe kalagila ainategahie." hu'ya hisaya yatetila kalagila aio'amategahie. Anumaya Koti'a "Ma kanomofe nenahaiyanagi'na kalagi aitegahue." huno hisia kanomona hau huno kalagila aine'ate. ¹⁷ Anumaya Koti'a Isipi sauve kanoa Felofe mage huno hige'ya kae-malenayane

"Alihetigatenoa yafe muki'a vea'mo'ya tokiya'ni'a agesaya yafe'ene navagemo'a muki'a kumate ute ete hisia yafe'ene 'Kagaya ala kano maiyo.' hu'na ali hetigatenoe." huno humaineane.

¹⁸ Anumaya Koti'a haisia vea'mogamina hauna humateno kalagila aimatenegi agai'a kema ohavisaya yafe nago'a vea'mogamina amaku amakesa alino aililematene. ¹⁹ Nago'amogatama nagai'fena mage hutama nahavigegahae "Na'a nehianagi na'a higeno vea'mogamifena 'Havi kava nehae.' huno nehie? Agai'ama haisia agu agesa havisia yana ta ani yafena 'Ohugane.' huno hutegahie?" hutama hugahae. ²⁰ Hugahagi kagaya mopale kanomoga hana'a augafa kano maineka Anumaya Kotifena aka huka kea vaitegane? Mopaleti aye kakalifeno talo humalenaya yopamo'a talo hutenea kanomofena "Na'a higeka nagaila ma'a huka talo hunatenane?" huno hugahio? ²¹ A'ao, na'a augafa kea ohugahie. Mopaleti aye kakalifeno

talo humalenesia kanomo'a talo humalenesia yana agai'a yane. Nagola mopamo alaga alino nagola kanale susufanea talo huteno ani alagaleti havi ali'yate susufanenema talo hisiana agai'a yane. ²² Anumaya Koti'a ani'a humaine. Tagaya agai'a talo humalenea susufane kana huta mainone. Nago susufane kana vea'mo'ya kefo yama humainayafe tusi hai vaimateno himamu'aleti "Amakata aisia yana amamigahue." huno humaineanagi mailava huno amakava-maineno kaiyekea hu no'amate. ²³⁻²⁴ Amakava-mainefafe tagaya Yuta vea'mo'yaene Yuta vea omainaya vea'mo'yaene agai'alega visunafe ke hulatenea susufane kana vea'mogatihena, tusiya huno kalagila ailatenea vea'mogatina "Haenagama tokiya hale yani'a tamamisugetama aligahae." huno hulatene. Nayona tokiya hale yama'a alisunafene huno talo hulatene. ²⁵ Ani yafena Hosea'a, Anumaya Koti aune kanomo'a Anumaya Koti humainea kea mage huno kae-maleneane

"Yuta veapi omainaya veafena 'Nagai'ni nofi anaga mainae.' hu'na hugahue. Nagu'a o'amaminesua anagafena 'Nahau nayamopafi nenahaiya anaga mainae.' hu'na hugahue. ²⁶ Anumaya Koti'a 'Nagai anaga omainae.' huno humainea kumatega Anumaya Koti'a amakaifena mage huno hugahie 'Tamakaya nahaimu hanea Anumaya Kotinina nafa'neyaga'ni'a mainae.' huno hugahie." huno humaineane.

27 Aisaiya'a Isaleli veafe mage huno kae-maleneane

“Isaleli vea'mo'ya nafa'ne'amima ate'ya atagufe'yama hage li kahaepa kana hu'ya kasago'ya vea'ne maigahayanagi osi anaga kano'a amaku amamena aligatigahue.

28 Anumayamo'a ma mopale mainaya veala kaiyekea humateteno 'Na'a yama aligahae.' huno humainea kemoni ani kavala fatago huno aupa kano'a humateteno ali ha'no hugahie.” huno humaineane.

29 Aisaiya'a hagoteno mage huno humaineane

“Muki'a tokiya'a hanea Anumayamo'a osi'a anaga kano'atihe kalagi aio'amatele'asina muki'amogatina Sotomu mainaya vea'nene Komola mainaya vea'nene fali'ya fanane humainaya kava hute'asine.” huno humaineane.

Isaleli vea'mo'ya amametiti ohayafe fatago veala omainae.

30 Na'a hu-maineanagita na'ane huta hisune? Yuta veapi omainaya veala fatago vea'ne maisayafe kasageke vokela ohunaya vea'mo'ya afa'a Yisasi'a hulatenea yafe havi'ya amakupi male'ya amametiti humainaya yateti Anumaya Koti'a ani vea'mogamifena “Fatago vea'ne mainae.” huno humatene huta hisuno? 31 Humateneanagi Isaleli vea'mo'ya tusiya hu'ya kahegi kemoni akave malesaya yafe kasageke vokela hayanagi ani kemoni akave malelama ohunaya yafe

fatago vea'nea omainae huta hisuno? ³² E, ani ke hisune. Na'a hige'ya fatago veala omainae? “Tagaiti kasageke hisuna ali'yateti fatago vea'ne maigahune.” hu'ya hayanagi “Yisasi'a hulatenea yafema havita lagupi maleta tametiti humainonafe ‘Fatago vea'ne mainae.’ huno hulategahie.” hu'ya ohunayanagi'ya fatago vea'nea omainae. Yisasi'a yafa kana humaineanagi agaifena havi'ya amakupina omalenaya yafe ani haleto'na yafate ayalega amaiya aye-ka'yopeli'ya asaga hulavi-mainae. ³³ Anumayamo auta'mafina mage hu'ya kae-malenayane

“Agegeho nagola aye hataga huli'ya asaga hulavisaya yafana Saiyoni* malogeno hane. Asaga hulavigahayanagi agaifema havi'ya amakupi malenaya vea'mo'ya amakayea ohugahae.” hu'ya kae-malenayane.

10

Muki'a Isaleli vea'mo'ya Anumaya Koti au'ava yana o'agenae.

¹ Nafu'naganagatama Anumaya Koti'a Yuta vea'mogami amaku amamena aligatisiafe aluya huno nenahaige'na muki'a yupa ani yafena nunamuna nehue. ² Amakayama nehaya kavala agete'na mani kea nehue amakaya Anumaya Kotina haisia kavala aluya hu'ya hisaya amaku amakesa nehaviyanagi anima haiya yafena havilama nohu'ya ani kavala nohae. ³ Anumaya Koti'a veafema “Fatago

vea'ne mainae.” huno humatenea yafena nohavi'ya “Ani kavala hulato.” hu'ya havinokagi amakai'amima maiya au'ava ya'amia “Anumaya Koti'a ageteno ‘Fatago kava nehae.’ huno hugahie.” hu'ya nehayanagi amakai'ami humainaya yafe ani kea huo'amategahie. ⁴ Huo'amategahigi Kalaisi'a hulatenea yafema havi'ya amakupi male'ya amametiti humainaya vea'mogamifena Anumaya Koti'a “Ago fatago vea'ne mainae.” huno humateteno ani yafena Kalaisi'a Mosese kahegi kemona alifatago huno ali ha'no humaineane. ⁵ Kahegi kema akave malesayana Anumaya Koti'a “Fatago vea'ne mainae huno humategahie.” huno Mosese'a mage huno kae-maleneane.

“Nago'a vea'mo'ya muki'a kahegi kema akave malesayana ani keleti vaiyegahae.” huno hu-maineane.

⁶ Hu-maineanagi nago'a vea'mo'ya Yisasi hulate-nea yafema havi'ya amakupi male'ya amametiti humainayafe Anumaya Koti'a “Fatago vea'ne mainae.” huno humatenea yamofena mage huno hie tamaku'afitila mage hutama haviokoho “Ta ikapinaga haiteno Kalaisina avaleno elavigahie?” hutama ohiho. ⁷ “Ta falimainaya vea'ne nelaviya kapina Kalaisina fali-mainefiti avalegahe tavigahae” hutama havi okeho. ⁸ Na'ane hie? Ani kemo'a tamahanile haneteno tamavay-ale haneno tamakupi hane. Anima hu falote nehuna kea Yisasi'ma hulatenea yafema havita lagupi maleta lametiti hisuna yafe humaine.

9 Tamakaya tamavayafiti “Yisasi'a Anumayani'a maine.” hutama huhaneletama tamaku'afitila “Anumaya Koti'a Yisasina fali-mainefiti ali hetitene.” hutama tamakupi maletama tamametiti hisageno Anumaya Koti'a tamaku tamamena aligatigahie. 10 Tagu'afina Yisasi'a hulatenea yafena havita tagupi maleta tametiti humainona yateti Anumaya Koti'a “Fatago vea'ne mainae.” huno hunelate. Tavayafiti “Yisasi'a hulatenea yafe havi'na nagupi malenoe.” huta hufalote nehuna yateti Anumaya Koti'a tagu tamena alinegatie. 11 Anumaya Koti' autamafina mage huno humaine

“Nago'a vea'mo'ya Yisasife havi'ya amakupi male'ya amametiti hisayana amakayea ohugahae.” huno humaineane.

12 Anumaya Koti' aulagafina Yuta vea'nene Yuta veapi omainaya vea'nene nago avamete hu'ya mainageno Anumaya Koti'a muki'a vea'mogami Anumaya'ami maineanagi'ya muki'a vea'moya agaitega ke hisageno kanale'ya huno amaya hisia yana kasago'ya amamigahie. 13 Anumaya Koti' autamafina mage huno humaineane

“Muki'a vea'mo'ya Anumayamo agi aye'ya ke hisageno'a amaku amamena aligatigahie.” huno humaineane.

14 Aligatigahianagi Yisasi'a hulatenea yafema havi'ya amakupi omalesayana hana'a hu'ya agia ayegahae? Yisasi'a hulatenea yafema ohavisayana hana'a hu'ya agaifena havi'ya amakupi male'ya amametitia hugahae? Nago kanomo'ma Yisasi'a hulatenea yafema huhaleno

hamaopaisiana hana'a hu'ya ani kea havigahae?
 15 Yisasi'a hulatenea yafema huhale'ya hisaya
 vea'ma hu o'amatesayana hana'a hu'ya ani kea
 huhale'ya hugahae? Anumaya Koti auta'mafina
 mage huno humaineane

“Yisasife kanale mono kea, tamaipa falu hutama
 maisaya kema, alino esia kanoa kanale
 kano maineanagita muse hisune.” huno
 humaineane.

*Muki'a Isaleli vea'mo'ya Yisasi'ma hulatenea
 yafena havi'ya amakupina omalena.*

16 Muki'a mani kema nehaviya vea'mo'ya
 havi'ya amakupina nomalae. Anumaya Koti
 auta'mafina Aisaiya'a mage huno humaineane

“Anumayamoga hana vea'mo'ya hamapauva
 kea havi'ya amakupi male'ya amametiti
 humainae?” huno havige-mainene.

17 Amakupi male'ya amametiti humainaya yamo
 havimainaya kefiti falote humaine. Anima
 havimainaya kea Kalaisife hamapaige'ya havi-
 mainae. 18 Nagaya ma'a hu'na tamahavi-negoe
 mani kanale kea ohavinao? A'ao tamagelafa
 hu'na tamahapauve muki'amo'ya ago havilinae.
 Anumaya Koti avopina mage huno humaineane

“Amake ai'yama haya kemo'a muki'a kotega
 ute ete huno ke'amimo'a muki'a kumate
 umaine.” huno humaineane.

19 Nago'ene tamahavi-negoe mani kanale kea
 Isaleli vea'mo'ya ohavinao? Tamage hu'ya ago
 havilinae. Hagoteno Mosese'a Anumaya Koti'ma
 humainea kea mage huno humaineane

“Nagaya havigu veala, nago nofipi omainaya anagapiti amavalesugetama ani yafena tamaipa havi haviya humategahae. Nago nofi veala, kanale'ya hu'ya havisaya amaku amakesa omalenesia veala amavalesugetama ani yafena ke vaigahae.” huno humaineane.

²⁰ Aisaiya'a tokiya'age huno Anumaya Koti'ma humainea kea mage huno humaineane

“Nago'a vea'mo'ya nagaifena natia no'ayesaya vea'mo'ya ago nagemainae. Nagaifema nago'a vea'nema hamavi-okenaya vea'mogami amaulagale ago fufute efalote huge'ya nagemainae.” ²¹ Isaleli vea'mogami-fena mage humaine “Aya'aya kanagefa nayateti 'Eho eho' hu'na kea huanagi nagai kea akave omaletama ke vaige vaige nehaya vea'mogatamae.” huno humaineane.

11

Anumaya Koti'a nago kaiyaga Isaleli veala ali kayone humatene.

¹ Tamahavigoe Anumaya Koti'a agai'a anaga'a amanati-talenefi? Tamage na'a ohune. Nagaya Apalahamu kola maine'na Penisamini nofi kano mainoe. ² Mani anagala nayona Anumaya Koti'a ehe'ma hapali-malenea anaga'a amanati-o'atalene. Ilaiya avagea Anumaya Koti avopima hanea kea ohavinao? Ilaiya'a Isaleli anagafe

nunamuna mage huno Anumayamotega havigemaineane. ³ “Anumayamogae vea'mo'ya kagai amaune vea'mogamina hamae'ya falimate'ya kagaife afu he'ya kae-salamana hunegataya ata halu'ya helaga'ya vaine'atalage'ya hage'na nagai'nige nagoke mainoge'ya nahaegahe tusiya hu'ya natine'ayae.” huno humaineane. ⁴ Higeno Anumaya Koti'a anona'ale'ma humainea kea havilinao? Agai avopina mage huno kae-maleneane

“Kagaikage omainanagi Seveni tauseni'a (7,000) vea'mo'ya onatalenae. Yafateti talo humalenaya Anumayamo agia Pali'e agia alisaga hu'ya amaku'a o'aminaya anaga'ni'a mainae.” huno humaineane.

⁵ Anima humainea kate meni kanaene Anumaya Koti'a agai'a kayone yama'aleti osi anaga'a agai'a vea'ne maisayafe ago hapali-malene.

⁶ Anumaya Koti'a agai'a kayone yama'aleti hapalimatenege kanale au'ava yama nehaya yateti hapalimatele'asina agai'a kayone yama'amo'a afa ya kana hile'asinagi agai'a kayone yama'aleti hapalimatene.

⁷ Na'a humaineanagita na'ane hisune? Isaleli vea'mo'ya Anumaya Koti'a “Fatago vea'ne mainae.” huno humatesiafe kasageke huge hugetayana o'alitafa hu'ya o'aligeno Anumaya Koti'a osi vea kano'a hapalimatenea veafe ani kea humatenegi nago'a vea'mo'ya ohavisayafene huno amaku'a alino aitalako humalene. ⁸ Anumaya Koti avopina mage huno

humaineane

“Anumaya Koti'a amaku'amonā alino amaukalo kalo humateno amaulaga alino asu humateno amakesa alino aililemateno hige'ya kea ohavi'ya maimē maimē e'ya meni kanaene ani kavake'ya hu'ya mainae.” huno humaineane.

⁹ Teviti'a ani avopina mage huno humaineane

“Ala imule'ma maisayana Anumaya Koti'a kalifu hanagi-malesigeno amatafa hisige'ya vaili'ya asaga hulavi'ya havi ya'amimo anona'amia aligahae. ¹⁰ Amaulagamo'a haniko'mako hisige'ya o'agetafa hisae. Muki'a kana yama alimainayafe amakave'yamo'ene agola fago-koko hu'ya vaiyesae.” huno humaineane.

Anumaya Koti'a Yuta veala omainaya vayamogami amaku amamena aligatimaine.

¹¹ Isaleli vea'mo'ya Yisasi kea amakave'no hutēnāyafe vaili'ya asaga hulavi'ya agola amako'ya faimainao? A'ao tamage hu'ya na'a ohunae. Yisasi kea amakave'no hutēnāyā yateti Anumaya Koti'a Yuta vea omainaya vea'mogami amaku amamena aligatisige'ya Isaleli vea'mo'ya agete'ya “Tagai'enena tagu tamena alilatisie.” hu'ya age hama'ye hugahae. ¹² Tamage Isaleli vea'mo'ya kefo kava hu'ya yagalaya yafe nago'a ma mopafi vea'mo'ya kanale yana alimainae. Isaleli vea'mo'ya Yisasi kea amakave'no hutēnāyafe Yuta veapi omainaya vea'mo'ya kanale yana alimainae. Kasago'ya

Isaleli vea¹mo¹ya ete¹ya Anumayamo kea havi¹ya akave malesayana tusi¹a kanale kanamo¹a falote humategahie. ¹³ Nagai¹fena “Yuta vea omainaya vea¹mogamite Yisasi kea huhaleka hamapaiyo.” huno hige¹na Aposolo kano mainoafe muse nehu¹na mani ali¹yana ne¹alua yafe tamakaya Yuta vea omainaya vea¹mogatama tamakaife nehue. ¹⁴ Manima nenahaiya ali¹yani¹aleti nagai¹ni¹a anagala, Isaleli anaga, nago¹a alihetimatesuge¹ya age hama¹ye hisageno Anumaya Koti¹a amaku amamena aligatisie hu¹na nehue. ¹⁵ Anumaya Koti¹a Isaleli anagala amanati-taleneafe muki¹a ma mopafi veafena mage huno humaine “Aigetamate¹na yuna helamate¹na nagoke taipa kalisune.” huno humaineanagi Anumaya Koti¹a eteno Isaleli vea¹nema amavalesiana fali-mainafiti hetiya augafa kava hugahae. ¹⁶ Hagote¹ya talo haya kai hamemo atupa¹a Anumaya Koti ne¹amiyane muki¹a tama¹aenena Anumaya Koti yane. Nagi yosamo hafu¹yama Anumaya Koti yama hanesiana muki¹a yosa akopa¹yagae-nena Anumaya Koti yane. ¹⁷ Anumaya Koti¹a agai¹a hoyafi hanea Olivi yosamona akopa¹a aye sasaene¹ataleno tamakaila Yuta vea¹ne omainaya vea¹mogatamina, afai Olivi yosamo akopa kana hutama mainageno tamavaleno fukiteti aye ka¹maelamateteno nofi kilamategetama mainetama ani yosafiti tima¹a aitama nena. ¹⁸ Ani yafe tamakaya aye sasaetalenea akopa¹ahena “Afa vea¹ne mainagi

tagaya tamakasetā ala vea'ne mainone.” hutama hu o'amateho. Tamakaya akopamogatama tima'a aitama tama yosamona amigeno nonegi hafu'yafiti tima'a aitama nenaē. ¹⁹ Tamakaya mage hutama nehaē “Tagaya kanale vea'ne mainonafe tagai akopa'ma aye ga'mae-malesia yafena Isaleli akopala ago aye sasaetalene.” hutama nehaē. ²⁰ Tamage Yisasife havi'ya amakupi omalaya yateti aye sasae-talegetama tamakaya Yisasife havitama tamakupi maletama tamametiti humainayafe aye ga'mae-malene. Tamakaila na'a humaleneafe “Ala vea'ne mainone.” hutama tamaugafa alitama ohaitama koli hutama tamakupi maletama tamametiti humainaya yama atalesayafe tamama'yoa aino. ²¹ Anumaya Koti'a agai'a Isaleli vea'mogamina akopa-tafama'a alino asasae-taleneanagino tamakaila ani kava'ma hisageno'a tamayoa okigahianagino ani kava huno tamakaila alino asasae-talegahie. ²² Ani yafe Anumaya Koti'a kayone hulata yama'aene kaiyeke hulatenō haviyama anona'a tamisia yama'aene agelama hisune. Agai'a kanale au'ava yama'a ne'atalaya veala kaiyeke humatenō tusiya huno havi yana anona'a amamiyanagi tamakaila kayone hunelamate. Tamakaila kayone hulamateneafe tamametiti hisageno Anumaya Koti'a nago'ene kayone hulamategahigi na'a ohisageno'a tamakai'enena ago alino asasae-talegahie. ²³ Nagi alino'ma asasae-talenea Isaleli veala akopa'yagamo'yama

ke nohavia ya'amima atalesageno'a Anumaya Koti'a eteno alino aiga'maematesia tokiya'a hanegenno eteno amavaleno me maleno aiga'maemategahie. ²⁴ Tamakaya Yuta vea'ne omainaya vea'mogatama hagotetama afai Olivi yosafiti falote humainea akopa mainageno Anumaya Koti'a vaya'mo'ya nohaya kava huno tamavaleno Isaleli vea'mogami Olivi yosale aiga'maelamatene. Tamage mani akopa'yagamogamina tama'amo'ya Isaleli vea'mogamina amavaleno eteno hagote yosa'amile maleno aiga'maemategahie.

Anumaya Koti'a muki'a veala kayone yama'a amaveligahie humane.

²⁵ Muki'a nafu'naganagatama nagola falaki-mainea kema havilama hutetama aneginagi ohisae hu'na tamahanepauve. Nago kaiyaga'a Isaleli anaga'mo'ya “Yisasi kea ohavigahune.” hu'ya tokiya vaimainagi ani kavala agola ohugahagi Anumaya Koti'a hapali-malenea Yuta vea omainaya vea'mogatama muki'a Anumaya Kotina tamaku'a amisageno hiya'ma hinageno'a Isaleli vea'mo'ya ete'ya Yisasi kea havigahae. Havigu tamakaitamihe “Tagaya muki'a ago havitafa huta havilinone.” hutama hisaya yafe mamona falaki-mainea ke tamahanepauve. ²⁶ Anumaya Koti'a muki'a Isaleli veala amaku amamena aligatigahie. Anumaya Koti autamafina mage hu'ya kae-malenayane “Yelusalemuti nagola amaku amamema aligatisia kanamo'a falote huteno vea'mogamina

kefo au'ava ya'amia alitalegahie.”

²⁷ Anumaya Koti'a mage huno humaine
 “Mani kea amakai'ene ali'na nagokepi
 ali'na hagelafi nelamatoe. Mage hu'na
 hugahue muki'a kefo yatamia alitalete'na
 ali'na hagelafilamategahue.” huno
 humaine.

²⁸ Isaleli vea'mo'ya Yisasi'a hulatenea yafena
 amakave'no hutenayafe Anumaya Kotina
 kame vea'a mainae. Ani'a humainaya yateti
 tamakaila Yuta vea omainaya vea'mogatamina
 tamaya humainegi nayona Anumaya Koti'a
 amakinagomogamife hamapaimaine. Isaleli
 veala hapalimateno amakaifena “Nahau
 nayamopafi nenagea vea'ne mainae.” huno
 humaine. ²⁹ Tamage Anumaya Koti'a hagoteno
 nago'a veala hapali-maleteno “Kanale ya
 hulamategahue.” huno huteno haenaga'a
 agu agesa eteno havino aiyahae ohugahie.

³⁰ Hagotetama tamakaya Yuta vea omainaya
 vea'mogatama Anumaya Kotina tamakave'no
 hutenagi menia Isaleli vea'mo'ya ani'a hu'ya
 Anumaya Koti kea akave omalayafe Anumaya
 Koti'a tamakaila kalagi ailamatene. ³¹ Tamakaila
 kalagi ailamatenage'ya agesayafe menia Isaleli
 vea'mo'ya Anumaya Koti kea akave omalenaleti
 ete'ya kalagi ailamategetama alimainaya yana
 amakai'ene aligahae. ³² Anumaya Koti'a muki'a
 vea'mogamina kalagi aimatesiafe hagoteno
 muki'a veala agai kema akave omalaya yateti
 nofila humatene.

Tagaya Anumaya Koti agia alisaga hisune.

³³ Nama'yo Anumaya Koti'a ala agu agesaene kano maineno muki'a yana haviline. Ve'a'mo'ya Anumaya Koti'a “Na'a ma'a hugahue.” huno hisia agu agesamo aepa'amo'a afe yapi tavi-maineanagi'ya ohavigahae. ³⁴ Anumaya Koti auta'mamo'a mage huno humaineane

“Hana ve'a'mo'ya Anumayamo agu agesa havilinae? ‘Na'a huo.’ huno agu agesa ta Anumaya Kotina amile'asine? ³⁵ Ta'e ‘Nagaya Anumaya Kotina nago yana amisugeno Anumaya Koti'a eteno anona'a namigahie?’ huno humaine?”

³⁶ A'ao Anumaya Koti'a muki'a yama talo humalenea kanogino aepa'a maine. Muki'a yana agai'a haumainea yama'age haneanagita tagaya agola muki'a kana'aene kana'aene Anumaya Kotina agai'age agi alisaga hisune. Tamage.

12

Tagaya Anumaya Kotina taugafa muse ya kana huta amisune.

¹ Nafu'naganagatama Anumaya Koti'a kalagi ailatea yafena havi'na tokiya'age ke lamahanepauve. Anumaya Kotife muse ya'amima sipi sipi he'ya aminaya kava hutama tamahaimula hanenagetama muse yana tamaugafa Anumaya Kotina amiho. Agaila alu aotage ve'a'ne'agitama Anumaya Kotina haisia kava hisayana fatago lamaku tamakesafiti Anumaya Koti agia alisaga hugahae. ² Tamakaya

ma mopafi vea'mo'ya nehaya augafa kavala ohutama lamaku tamakesa aiyahae hageno Anumaya Koti'a yaufa lamaku tamakesa tamamineafe agai'ma nehaiya kavafena havilama hutama havigahae. Ani kavala kanale yane. Muki'a yamona ago agaseno kosa hetenea ya hane.

Anumaya Koti'a muse ya taminea yama'aleti ali'yana alisune.

³ Anumaya Koti'a agai'a kayone yama'aleti ali'yama'a namineafe nagoke nagoke'mogatamina tamahanepauve “Anumaya Koti'a na'a yama namine.” huka haviteka kagaika kaugafa alika ohaiyo. Anumaya Koti'a agai'alefe havitama tamakupi maletama tamametiti humainaya yana nagoke nagoke'mogatamina ala yano osi yano afa'a tamamineafe fatago lamaku tamakesa havitetama lamakaitami fako hiho. ⁴ Nagoke taugafamo'agi alagate alagate taugafa haneno alu ali'ya alu ali'yana ne'aliye. ⁵ Tagaya muki'a vea'mogata ani kava huta Kalaisi'ene aiga'maeta agai augafa nagoke maineta afalu falu huta nagoke mainone. ⁶ Mainonageno Anumaya Koti'a kayone hulateno muse yatia haote haote huno agai'a ali'ya alisuna tokiyatia ago tamine. Nago'a vea'mogamina Anumaya Koti'a avayafiti hamapai-mainea kea huhale'ya hisaya tokiya muse huno'ma amaminesiana Yisasife havi'ya amakupi male'ya amametiti humainaya ke'age huhale'ya hamapaisae. ⁷ Nago'a vea'mogamima

muse yama amafu-amakanagami amaya hisaya tokiyama amaminesia ali'yana ali'ya tokiya vaisae. Nago¹a vea¹mogamina vea¹ne humaveli hamaveli hisaya tokiyama amaminesiana ali lokiya vai'ya humaveliho. ⁸ Nago¹a vea¹mogamina vea amaku amakesa ali hetimatesaya tokiyama amaminesiana ali tokiya vai'ya ani amaku amakesa ali hetimatesae. “Nafu¹naganagamima nago yama amamigahue.” huno humainesia tokiyama amaminesiana kasago¹ya male kosa he¹ya amamiho. Kava ali'ya alisaya tokiyama amaminesiana amaku¹aleti ani kava ali'yana ali'ya maiho. Hauma huteno afu¹aganama ayama hisia tokiyama amaminesiana amaipa falu yapiti amaya hiho.

Tafu-taganagamina tamage huta tagu'a amamisuna ke humaine.

⁹ Tamafu-tamakanagamima tamaku¹a amamigahena tamagelafa hutama amamiho. Kefo kavala tamakave¹no hutetama kanale kava hisaya yama¹age atafa hutama tokiya vaiho. ¹⁰ Tamafu-tamakanafema aluya huno tamahaisigetama tamaku¹a amamiho. Nagoke nagoke¹mogatama tamafu-tamakanagami amakia alisaga hutama “Hagoteho.” hutama humateho. ¹¹ Muki¹a kanafina ali'yage¹ya ne¹alisagetama kasalo kasala kea ohiho. Tamakupina Alu Aotage Avamu¹mo tokiya¹aleti tamakaila ali hetinagetama Anumayamo ali'yana aliho. ¹² Muse nehutama Anumayamo¹ma hulatesia yafena

tamametiti hutama agava maiho. Kana yama falote hisigetama hetitama tokiya vaiho. Muki'a kanafina Anumayamotega havige havige hutama maiho. ¹³ Anumaya Koti anaga'mogamima nago'a ya'amimo'ma kosa heo'amatesigetamahena amaya hiho. Natu vea'ma esagetama ali kayone hutama amateho.

¹⁴ Nago'a vea'mo'ya ali haviya hulamatesagetama “Ani veala alika kanale humato.” hutama Anumaya Kotitega havigeho. “Alihaviya humato.” hutama haviokoho. ¹⁵ Nago'a vea'mo'ya kigi yokalo hu'ya maisagetama tamakai'enena ani'a hutama maiho. Nago'a vea'mo'ya avima atesagetama tamakai'enena ani'a hutama avia ateho. ¹⁶ Tamafu-tamakanagami'enena nagoke tamaku tamakesale maiho. “Ala vaya mainone.” hutama ohutama afa vea'nene vaiyatete hiho. “Nagai'nige kanale nagu nagesa hane.” hutama ohiho.

¹⁷ Nago'a vea'mo'ya havi kava'ma hulamatesagetama anona'a havi kavala hu o'amateho. Muki'a vea'mogami amaufina kanale kavake'ya hiho. ¹⁸ Tamakaitamia tuma hisaya yafena tamakesa ohavitafa hutama muki'a vea'nenena yuna hetama maiho. ¹⁹ Nahaumainea nafu'naganagatama tamakai'ma havi yama hulamatesaya anona'a “Ani kavala humategahune.” hutama ohiho. Anumaya Koti'a ani yama haya kavala agai'a anona'a amamisiafe maitama haleho. Anumaya Koti avopina mage hu'ya kae-malenayane

Anumayamo'a mage huno humaine “Havi kava'ma humatesaya anona'a amakata aisia yana amamisua yana nagai'ni ali'yane.” huno humaineane.

²⁰ Havi yamo anona'a o'amamigahagi Anumaya Koti avopina mage hu'ya kae-malenayane Kame vayatamimogamima amakatesigetama kavela afa'a amamiho. Tifema amakesigetama tina afa'a amamiho. Na kava hutama ali kayonema humatesage'ya amakaye hinage'ya atalegahae huno humaineane.

²¹ Atalesanageno havigu havi yamo'a katafa huyafenagi kanale yama'age hugeno ani havi yamona agaseno.

13

Tagaya Kamani vaya'mogami amakave maleta maisune.

¹ Muki'a vea'mogatama Kamani vaya'mogami kea akave maleho. Nago Kamani kanoa agai'a falote huno omainegi muki'a Kamani ali'yana Anumaya Koti ayapiti alino falote humalege'ya yagai-mainae. ² Kamani vaya'mogami kekena “Kahaote'yakae.” hu'ya hisayana Anumaya Koti'enefe “Kahaote'yakae.” hu'ya nehae. Ani kava'ma hisaya vea'mo'ya amakai'ami amakata aisia anona'a aligahae. ³ Kanale kava nehisaya vea'mo'ya Kamani vayafena kolia ohugahagi havi kava'ma nehisaya vea'mo'ya koli hugahae. Kamani vayafe kolima ohinutama kanale kavake'ya hiho. ⁴ Kamani vaya'mo'ya

tamaya hisagetama kanale¹ya hutama maisayafe Anumaya Koti ali¹ya vaya mainagi havi kava¹ma hisayana tamahaesaya tokiya¹amia haneafe koli hiho. Havi kava¹ma hisaya vea¹mogamina havi yana anona¹a amakata aisia yama amamisayafe Anumaya Koti¹a humatege¹ya agai ali¹yana ne¹aliye. ⁵ Kamani vaya¹mo¹ya hamai vai yama tamisaya yafekela kolia huta amakai kea ohavisunagi tagaiti lagu¹amo “Na¹a hiho.” huno hisia kavake¹ya huta akave malesunafe Kamani vaya¹mogami kea akave malegahune.

⁶ Kamani vaya¹mo¹ya Anumaya Koti ali¹ya ne¹ali¹ya muki¹a kanafina ani ali¹yateke¹ya kava yagai lokiya¹age humainayafe tamakaya tamaugafale takesi monea ne¹atalae. ⁷ Anona¹a muki¹a kava vayala ne¹amamitama tamaugafaleti¹ma kanisole takesiene Kamani takesiene amamiho. Kava vayatamimogamina amaiya¹afinaga ako hutama mainetama amakia alisaga hisaya vaya¹mogamina amakia alisaga hutama maiho.

Nago¹a vea¹mogamina tagu¹a amamitafa huta amamisune.

⁸ Nago yana tamamitage¹ya “Haenaga¹a tamamigahune.” hutama humainesaya yana aupa¹a amamiho. Tamafu-tamakanagamina tamaku¹a amamitama amaya hiho. Nago¹a vea¹mo¹ya amafu-amakanama amaku¹ama amamisayana muki¹a kahegi kemoni akave nemalae. ⁹ E, kahegi kemo¹a mage humaine, Kumai he kavala ohuo. Veala haegeni

ofalino. Musufa yana ohuo. Alu kanomo ku'afenotela ageka kaha'yea ohuo huno nago'a kene humainegi muki'a kahegi kemona aepa'amo'a nagoke mage huno hane, kagaika kaugafahema kahaiya avamete muki'a vea'mogami amaugafahena kahaino huno humaineane. ¹⁰ Muki'a vea'mogami amaku'ama ne'amamiya vea'mo'ya alu vea'mogamina havi kavala huo'amategahae. Ani yafe vea'mo'ya amaku'ama ne'amamiya veala muki'a ani kahegi kemona akave nemalae.

Tagaya fatago huta kana vaiyesune.

¹¹ Menima mainona kanafima nehaya kavala ago havilinayafe tamaula faetama omaitama hetitama maisaya kanamo'a ago falote humaine. Tagayama hagoteta Yisasife havita lagupi maleta tametiti humainona kanafina Anumaya Koti'a tagu tamema aligatisia kanamo'a alu'ale haneanagino meni kanafina ago eno aupa nehie. ¹² Hanima kimainea kanamo'a ago ha'no hugahe nehigeno ko'ma alino halesia kanamo'a ago falote hugahe nehiafe muki'a hani yapima nemaiya au'ava yana ataleteta tuma hisuna kenatia, hale yamo au'ava kenatia failisune. ¹³ Kama vaiyesunana fatago huta vea'mo'ya yagefima vaiyaya avamete huta vaiyesune. Alitalu huta havili neta hagifali kea ohatageta aneginagia ohisune. Ageta laha'yea huta augafale maita yokalo o'ateta moli huliteta ohisune. Alu kanomo yatela ageta laha'yea ohuta tua ohisune. ¹⁴ Anumayatimona Yisasi Kalaisina kenatami

kana hutama avaletama taugafale aiga¹maetama age lamahaye hisaya yafena tamakesa havi havi hutama omaiho.

14

Tagaya nelafugami no maiyana fako huo¹amatesune.

¹ Nago¹a tamafu-tamakana¹ya Yisasi¹a hulatenea yafena havi¹ya amakupi male¹ya amametiti nehayanagi Anumaya Koti¹a “Ago fatago vea¹ne mainae.” huno humatenea yafena havilama ohu¹ya “Na¹a kava hisunageno Anumaya Koti¹a ‘Fatago vea¹ne mainae.’ huno huotategahie.” hu¹ya nehaya veala tamakai¹ene nagopi maisayafe amavaletama amateho. Amategahagi amakaya amakesafiti alu ke hisaya yafena kea vaitama ani keletila tua hu omateho. ² Nago¹a kafu-kagana¹a “Muki¹a kavela negahue.” huno agesa nehavianagi nago¹a kafu-kagana¹a Yisasife havino agupi maleneanagino Anumaya Koti¹a “Ago fatago kano mainane.” huno hutenea yafena havilama ohuno “Anumayamo¹a fatago kano mainane huno hunatesiafe afumo amela onegahue.” huno humaine. ³ Muki¹a kave¹ma nesia kafu-kagana¹a afuma nonesia afu-agananafena “Afa kano mainane.” huno huo¹ateno. Afumo ame¹ama nonesia afu-aganana¹a muki¹a kave¹ma nesia afu-agananafena “Na¹a kano mainane.” huno huo¹ateno. Anumaya Koti¹a ani tole kanolatana ago anavale-mainae. ⁴ Kagaya taga maineka nago kanomo ali¹ya kanohena “Na¹a ali¹ya kano

mainane.” huka hune'atane? Agayama ani kanomo ali'yate'ma fatago huno alisiano havi ali'ya alino maisiano agai'a kava kano'amo yane. Kagai yana omalene. Anumayamo'a agai'a ali lokiya vaitesia tokiya'a haneafe ali lokiya vaitesigeno maigahie.

⁵ Nago'a tamafu-tamakana'ya ma amakesa nehaviye “Nagoke kanale'ma mauna yamo'a alu kanamona agase-maineanagita ani kanaleke'ya alitalu huta Anumayamo agia alisaga hugahune.” nehage'ya nago'a tamafu-tamakana'ya “Muki'a kanamo'a nagoke avamete humainea kanale nemaune.” hu'ya nehayanagi nagoke nagoke vea'mo'ya amakai'ami amaku amakesa havilama hisae. ⁶ Nago tamafu-tamakana'a agesa haviteno “Nagoke kanama mauna yamo'a nago'a kanamona agase-maineanagita ani kanaleke'ya alitalu huta Anumayamo agia alisaga hugahune.” huno hisia kanomo'a Anumaya Koti agia alisaga hisiafe ani kavala nehie. Nago tamafu-tamakana'a “Muki'a kavela negahue.” huno hisiana Anumayamotega nunamu huno muse hutenea yafenagino Anumayamo agia alisaga humainegi nago tamafu-tamakana'a afumo ame'ma monesia kanomo'a “Anumaya Koti agia alisaga hugahue.” huno monesie. Agai'enena Anumaya Kotitega nunamu huno muse huno havinege. ⁷ Nago kanoa haegafa huno maisiana agai'alefeke'ya huno omaine. Nago kanoma falisiana agai'alefeke'ya huno ofaline. ⁸ Tahaimu'ma

hanesigeta maisunana Anumayamo agia alisaga hisunafe mainone. Falisunana ani'a huta Anumayamo agi alisaga hisunafe faligahune. Ani'a humaineafe tahaimu'ene maisunano falisunano Anumayamo anaga mainone. ⁹ Fali-mainaya veate'ene hamaimu hanege'ya mainaya veate'ene Anumaya'amimo maisiafe Kalaisi'a faliteno eteno haimu alino heti-mainone.

¹⁰ Nago'a vea'mogatama na'a higetama tamafu-tamakanagami no maiyana fako hune'amatae? Nago'a vea'mogatama na'a higetama tamafu-tamakanafena "Afa kano mainane." hutama hune'amatae? Tagaya muki'amogata Anumaya Koti'a ala kaiyekema hulatesifina hetigahune. ¹¹ Avopina mage huno kae-maleneane

Anumayamo'a mage humaine "Tamagelafa hu'na tamahanepauve muki'a vea'mo'ya nagaifena mage hu'ya hugahae 'Kagai vea'ne mainonagi kava hulato.' hu'ya hugahae. Muki'a vea'mo'ya 'Kagaya Anumaya Kotiti mainane.' hu'ya nagia alisaga hugahae." huno hige'ya kae-malenayane.

¹² Kae-malenageta tagaya ageteta havilinone muki'a nagoke nagoke'mogata nemauna au'ava yatimo aepatia Anumaya Kotina hapaigahune.

Tafu-taganagamina kefo kava hisaya augafa kavala hu o'amatesune.

¹³ Tafu-taganagamifena "Na'a nehane." huta fakoa humateta nago'ene havi tagesa

havi o'amamisune. Na'a ohisunana tafu-tagana'ya tagete'ya asaga hulavi'ya kefo kava hisaya yafenagita havi kavala ohisune.

¹⁴ Anumayanimo'a Yisasi'ene ailokae'na maine'na ago havilinoe nago'a kave'mo'a oni'ya'age ohune. Nago kanomo'ma agai'a agu agesafima "Oni'ya'age humaine." huno havisia kave'mo'a oni'ya'age haumaine.

¹⁵ Kagaya nago'a kave'ma nenana yafena kafu-kaganana agu agesa alihaviya hutesanana kahau kayamopafi negahaiya kavala nohane. Kalaisi'a ani kafu-kaganana agu amena aligatisiafene huno fali-maineanagika nesana kavetetifene huka alihaviya huo'ato.

¹⁶ Kanale kava hisaya yafena havigu vea'mo'ya "Havi kava nehae." hu'ya hulamateyafenagi kava yagaiho.

¹⁷ Kave'ma nene'ya tima nene'ya nehaya yamo'a Anumaya Koti'a kava yagailatesia yamona aepa'a omaleneanagi Alu Aotage Avamu'mo taminea fatago kava'ene taipa falu hisia ya'ene muse hisuna ya'ene aepa'a hane.

¹⁸ Haneafene hu'ya nago'a vea'mo'ya ani kava hu'ya Kalaisi ali'yama alisayana Anumaya Koti'a "Kanale kava haya vea'ne mainae." huno hulamatesige'ya nago'a vea'mo'yaene "Kanale vea'ne mainae." hu'ya hulamategahae.

¹⁹ Ani yafe tagaya nagoke tagu tagesale'ma maisuna kava'ene tafu-taganagami amaya huta tokiya'age hu'ya maisaya amaku amakesale maisaya kavala hisune. ²⁰ Tamakaya kave nesaya yafeke'ya nehutama Anumaya Koti ali'yana

alihaviya ohiho. Muki'a kave neyana kanale yanagi kagaya nana kavemo'a kafu-kagana'ya asaga hulavisaya kava humatesanana tusi'a havi kava nehane. ²¹ Afua nesano havilima nesano nago'a kava'ma hisana yamo kafu-kaganana asaga hulavisia kava'ma hutesanana ani'ama hisana kavala atalo. ²² Ani yafema havika kagupi malenana yana kagaikaene Anumaya Koti'ene tanakaitanige'ya hanesie. Nago kanomo'ma nago'a nesia yafe'ene hisia kava'enena agai'a agu'amo'a kaiyekema huo'atesiana ani kanomo'a muse hugahie. ²³ Muse hugahianagi nago kanomo'ma nesia yafema tole agesa haviteno nesiana Anumaya Koti'a "Havi kava nehane." huno hutegahie. Ani kanomo'a "Kanale ya nenoe." huno agupi omaleneafe havi kava nehie. Muki'a yana "Ma'a kavala kanale kavale." huta lagupi omalenona yana kefo yane.

15

Kalaisi agu agesamo'ma humainea kavafeke'ya akave hisune.

¹ Yisasife tamametiti huta tokiya ne'vauna vea'mogata amametiti ya'amimo'ma tokiya o'vainea vea'mogami kana ya'amia "Tamakaitami aliho." huta ohisunagi tagaya ha'ma'maeta alita tagaiti lagu tagesamo'ma haisia kavala ohisune. ² Ohisunagi muki'amogata tahaote tahaote tagaya tavate'ma mainesaya veala amaya hisunage'ya kanale'ya

hu'ya Yisasife havi'ya amakupi malenesaya ya'amimo'a tokiya vaisie. ³ Tagaya ago havimainone Kalaisi'a agai'a agu agesamo'ma haiya kavala akave omalenea yafena Anumaya Koti avopina agai'fe mage hu'ya kae-malenayane “Vea'mo'ya kagai'ma Anumaya Kotiga hu haviya hunegataya kemo'a nagaila melino aiso hunenate.” huno humaineane.

⁴ Nayoma kae-malenaya kemo'a meni kanafima tagesa alino akalo hisiafene hu'ya kae-malenayane. Anumayamo kema kae-malenaya kefiti tokiya vaisuna ya'ene tagu tagesa ali hetilatesia ya'ene haneafe tametiti yatimo'a tokiya vailategahie. ⁵ Anumaya Koti'a veala tokiya vaisaya ya'ene amaku amakesa ali hetimatesia ya'ene aepa'agino tamaya hisigetama Yisasi Kalaisi humainea au'ava yana akave maletafa hutama nagoke tamaku tamakesale maisae hu'na Anumayamotega havinegoe. ⁶ Na'a hisayafe nagoke tamaipale maitama nagokete tamaku'a maletama Anumayatimona Yisasi Kalaisina Nefana Anumaya Koti agia alisaga hisae.

Kalaisi'a Isaleli vea'nene Isaleli vea omainaya vea'nene amaya humaine.

⁷ Vea'mo'ya Anumaya Koti agima alisaga hisayafe Kalaisi'a tamakaila ali falu fala hulamateno tamavale-mainea kava hutama tamafu-tamakanagamina ali falu fala humatetama amavaletama nagoke tamaipale maiho. ⁸ Tamahapauve Anumaya Koti'a Yuta

vea'mogati taginagomogamife hamapai-mainea kemo'a falote huno fatago hinage'ya “Anumaya Koti'a tamage'age kano maine.” hu'ya hisayafene huno Kalaisi'a Yuta vea'mogamina amaya humaine. ⁹ Amaya hige'ya Yuta vea omainaya anaga'mo'ya Anumaya Koti'a kayone hulamatenea yafe agia alisaga hisaya yafena Anumaya Koti avopina mage hu'ya kae-malenayane

“Na'a hisige'na Yuta vea'ne omainaya veap-ina kagia alisaga hu'na musena hugate-gahue. Mono yagamefiti'ene kagia alisaga hugahue.” huno humaineane.

¹⁰ Ani'a huno nago kemo'a ma'a humaine

“Tamakaya Yuta vea omainaya anaga'mogatama agai'a nofi anaga'aene ailalupetama muse hiho.” huno humaineane.

¹¹ Ani'a huno nago kemo'a mage humaineane

“Tamakaya Yuta vea omainaya anagala Anu-maya Kotina agia alisaga nehige'ya muki'a vea'mo'ya ani'a hu'ya agia alisaga hiho.” huno humaineane.

¹² Ani'a huno nago kea Aisaiya'a Anumaya Koti aune kanomo'a mage humaineane

“Yesi anagapiti aginagomo'a falote huno Yuta vea omainaya vea'mogatamina kava yagai-lamatesigetama agaifena ‘Tagu tamena ali-gatigahie.’ hutama tamametiti hugahae.” huno Aisaiya'a humaineane.

¹³ Anumaya Koti'a tametiti yatimo aepa'agino agaifema tamakupi malenaya yateti tusi'a muse ya'ene tamaipa falu hisia ya'ene tamamino

havatelamatesigetama Alu Aotage Avamu¹mo tokiyaleti tusiya hutama Yisasi¹ma hulamatenea yafena tamametiti hisae hu¹na nunamuna nehue.

Polo¹a Yisasi kema hamapai-mainea yafena agai¹a tusi¹a muse humane.

¹⁴ Nafu¹naganagatama nagai¹ni¹a nametiti huana tamakaya kanale au¹ava yana kasago¹ya nehae. Muki¹a ke havi yana tamakesaene vea¹ne mainae. Tamakaitami o¹aya a¹aya hutama hamapaisayana kanale amaku amakesa tamafu-tamakanagamina amamigahae. ¹⁵⁻¹⁶ Amamigahagi Anumaya Koti¹a kayone yama¹a namiteno Yuta vea omainaya vea¹mogami amu¹nopi Yisasi Kalaisi ali¹ya alisanafene huno hunateneafene hu¹na nago¹a kema kaemaloa kemo¹a tamaku tamakesa ali¹na hao hu¹na ali hagalo hugahe tokiya vai¹na negaove. Afa¹a nokaogi mono note kava veya kana hu¹na maine¹na Anumaya Koti¹a hulatenea kanale mono kea huhale¹na hisuge¹ya Yuta vea omainaya anaga¹mo¹ya ali¹ya amakupi malesageno Alu Aotage Avamu¹mo¹a “Alu aotage vea¹ne mainae.” huno humatesige¹na amavalesuge¹ya Anumayamo avate esage¹na amisugeno Anumaya Koti¹a musena hugahie. ¹⁷ Na¹a hisige¹na nagaya Yisasi Kalaisi¹ene ailokae¹na maine¹na Anumaya Koti ali¹yama ne¹alua yafena tusi¹a muse nehue. ¹⁸⁻¹⁹ Kea nagoke yafeke hu¹na falote nehue. Yuta vea omainaya vea¹ma Anumaya Koti kema akave

malesayafe Kalaisina agai'a tokiyaleti nehue. Nagai'ni kanale au'ava yateti'ene humainoa keleti'ene tokiya avame'yama hua ya'ene Alu Aotage Avamu'mo tokiyaleti'ene hamane'pauve. Yisasi'ma hulatenea yafema kanale mono kema hulama hu'na hamapauvana Yelusalemuti aepa he'na muki'a kotega ute ete hu'na Ililikumua uva'yi humainoe. ²⁰ Nago'a mopalega Kalaisi agima ohavinaya haigilega ani ali'yana ali'na Kalaisi'ma hulatenea yafena kanale mono kea hamapaisua yafeke'ya nenahaiye. Havigu alu kanomo hagoteno Yisasi kea hamapaiteno ani kanomo'a posi ayemalenesia yosale no mo kisua yafena nonahaiye. ²¹ Anumaya Koti avopi kaemalenaya kate hugahe nehue. Mage hu'ya kaemalenayane

“Agai avagema ohavinesaya vea'mo'ya agegahae. Ke'lama ohavinesaya vea'mo'ya aepa'a havigahae.” huno humaineane.

Polo'a “Lomu vea'ne tamakete'na Sipeni ugahue.” huno humaine.

²² Muki'a kanafina Lomu mainaya vea'mogatamalega ugahe huanagi visua kana ani ali'yamo tilege'na o'unoe. ²³⁻²⁴ O'unogi meni kanafina malega hanea ali'yanila alivaya ayoanagi'na aya'aya kafugefa lamakaitega visue hu'na nagesa havi havi humainoafe menia Sipeni visua katelagi'na osi kanalega tamakai'enena mo fae'na hu falu fala hulamatete'na muse hu'na mainesugetama naya hisage'na Sipenia ugahue. ²⁵ Tamakaitega ugahuanagi hagote'na

Yisasina amaku¹a aminaya vea¹ne amaya hisuafe Yelusalemu ne¹ue. ²⁶ Nago¹a ya¹amima omalenea veala Yelusalemu maine¹ya Yisasife havi¹ya amaku¹a aminaya vea¹mogamifena Masetonia vealagi Akaiya vealagi amakesa havite¹ya muse hu¹ya monea amamigahe nehayanagi¹na ali¹na momamigahue. ²⁷ Hagoteno Yuta veala Anumaya Koti¹a amaku amamema aligati-mainea kanale mono kema Yuta vea omainaya vea¹ma hamapaimainaya yate ani vea¹mo¹ya anona¹amia haneanagi¹ya amaipamo¹a kanale¹ya hige¹ya “Amamigahune.” hu¹ya Yuta veala amaugafale yana kanale humatesia yama amamisayana kanale yane. ²⁸ Ani monea alitalu hu¹ya namisage¹na ali¹na Yelusalemu muki¹a monea momamite¹na tamakaya mainalega ute¹na Sipenia ugahue. ²⁹ Tamakaitegama uva¹yi hisuana ago havuana Kalaisina kanale manu¹amo¹a havatenateneanagi¹na tamakaitega egahue. ³⁰ Muki¹a nafu¹naganagatama musetami nehugi Anumayatimo¹a Yisasi Kalaisi hulatenea yafe¹ene Avamu¹mo¹ma tahau tayamopafi nelahiya yama taminea yafe¹ene lamahavi-negoe tokiya vaitama nagaifena ke hutama Anumayamotega havigegenonagaila naya hino.

³¹ Mage hutama nunamuna hiho “Yutia mainaya vea¹mo¹ya Yisasi kea nohaviya vealagi¹ya Polona atafa hu¹ya ali haviya hutegahe nehagi kagaya Anumaya Kotiga augafa aligatio. Yelusalemu maine¹ya Yisasina amaku¹a aminaya veala Polo¹a amaya hisige¹ya

ma ma hama'maesia ali'yama ne'alia yafena hamaisige'ya musena hisae.” hutama havige'ho.
³² Na'a hutama havigesageno'a Anumaya Koti'a hainagenofena lamakaitega eva'yi hu'na muse hu'na tamakayaenena maifalu hugahue.
³³ Anumaya Koti'a taipamo'ma falu hisia yamona aepa'agino tamakai'ene muki'amogatamaene maisie hu'na nehue. Tamage.

16

Polo'a muki'a vea'mogamina “Felugae.” huno hu falu humatene.

¹ Fipi'a tusi'a kanale'ya huno Yisasina agu'a aminea tasatimo'e, Senikalia maine'ya Yisasina amaku'a aminaya vea'mogamina kanale'ya huno amaya humaine. ² Anumayatimo'ene ailokaetama mainayafe Fipina avaletama amu'notamifi atesageno maisie. Anumaya Koti nafa'nemogatama na'a hisunana kanale yane. Nagi nago'a yamo'ma kanama haisigetama kanale'ya hutama aya hiho. Fipi'a ani'a huno hagoteno'a nagayaene kasago'ya vea'nene taya humaineane.

³ Yisasi Kalaisi ali'yama naha'mae'ana ne'ali'a alavelafena Palisilagani Akuvilaganina hutama falu fala hunateho. ⁴ “Kagai'ma kahaesageta'a faligahune.” hu'ana humaina'afe nagayake musena huno'اناتogi muki'a Yuta veya omainaya Yisasi anaga'mo'yaene hu'ya musena hune'anatae.

5 Anakai nopima Yisasi kema havigahe melitaluma nehaya vea'nene nagaila hu falu fala ke'nia humateho. Epainetasina, Esia kotega mainaya vea'mogamina hagoteno amakaseno Kalaisi kea havino agupi malenea kanoa maineanagino nahau nayamopafi nenagea nenafuna nagaila hu falu fala ke'nia huteho.

6 Ani'a hutama Malia'a, tamakai'enema maineno'a tamaya hugahena tusi ali'ya ali-mainea alagi hutama falu fala huteho.

7 Atalonikusigani Yuniasiganina ani'a hutama nagaila hu falu fala ke'nia hunateho. Nagaya Yisasi kema ohavinoa kanafina ani kanolatana Yisasife havi'ana anakupi malete'ana Aposolo vaya'mogami amu'no'amifi anaki hanea kanolata maine'ana nagai'ene Yuta nofi vaya mainonanagita nagai'ene Yisasi kema humainona yateti nofila hulatenayane.

8 Ampiliatusina Anumayamo'ene ailokaeya'age'na nagu'a aminoa nenafu'agi nagaila hu falu fala ke'nia huteho. ⁹ Tamakaya Upanusi'a Anumayamo ali'yana tokaeta'a ne'alua kanoene Setakisina kanale'ya hu'na nagu'a aminoa nenafu'ene nagaila hutama falu fala ke'nia hune'اناتetama hiho.

¹⁰ Apelesi'a Kalaisina akave'ma nemaliafe agia hanegi nagaila hu falu fala ke'nia huteho. Alisitopulusi afamo'mogamina nagaila hu falu fala ke'nia humateho. ¹¹ Helotioni'a nagai nofi vayalagi nagaila hu falu fala ke'nia huteho. Anumayamo'ene ailokae'ya mainaya tafu-taganagamina Nasisusi afamo'mogamina

nagaila hu falu fala ke'nia humateho.

¹² Talifinagani Talifosagania Anumayatimo ali'ya tusiya hu'ana ne'ali'a kanolatanagi nagaila hu falu fala ke'nia hunateho. Pesi'a nahau nayamopafi nenagea alagi Anumayatimo ali'yana ali-mainefefe nagaila hu falu fala ke'nia huteho.

¹³ Lufusi'a kanale'ya huno Yisasina akave nemalea kanoene ita'amo'enenagaaila hu falu fala ke'nia hunateho. Lufusina ita'amo'a ita'nimo kana huno naha'nemaeyane.

¹⁴ Asinakalitusi'ma Falegoni'ma Hemisi'ma Patolopasi'ma Hemasi'ma amakai'enema tokae'ya mainaya nafu'naganagamina nagaila hu falu fala ke'nia humateho. ¹⁵ Filologusi'ene Yulia'ene Neleusi'ene asa'amo'a Olipasi'ene amakai'ene mainaya Yisasi anaga'ene nagaila hu falu fala ke'nia humateho.

¹⁶ Anumaya Koti anaga'mogatama nehuna kava hutama tamahaote tamahaote muki'a tafu-taganagamina tamayana amamitama ali falu fala humateho. Muki'a kumate maine'ya Yisasi anaga'mo'ya "Mainafio?" hu'ya hu falu fala hulamatae.

Nago'a vaya'mo'ya Yisasi anaga'mogami amu'nopiti ali'ya aye fako humainae.

¹⁷ Muki'a nafu'naganagatama tamakesa alisua kea haviho. Nago'a vaya'mo'ya emaine'ya tamahapai-mainoa kemona amakave'no hute'ya ne'atagae'ya tamakaya mono kema havigahe alitaluma nehaya yapi melifako hisaya kema nehaya vaya'mogamifena ka'yetama

mainetama ani kema nehaya vaya¹mogamina tamakave¹no humateho. ¹⁸ Ani vaya¹mo¹ya Anumaya Kalaisi ali'yafena amakesa ohavi¹ya amakai¹ami age hama¹ye hisaya yafeke¹ya akave malesaya amakesa nehae. Hagalama-haisifa ke hu¹ya masave amake ne¹ai¹ya amaipafi ayegesage¹ya kanale amakesama nohaviya vea¹nea ayemavataga hu¹ya alihaviya humategahae. ¹⁹ Tamakaya Yisasi¹ma hulatenea yafena havitama tamakupi maletama atafa hulinaya kea muki¹a vea¹mo¹ya ago havimainaya yafena havite¹na tusi¹a muse nehue. Kanale au¹ava yamo aepa¹a havilama hutama nago¹a kefo yamofe tamakesa ohavisae hu¹nahe nehue. ²⁰ Anumaya Koti¹a, taipa falu hisia yamona aepa¹agino, aupa kanafi Satanina taiyafinaga ayeno tatapegahie. Yisasi¹a Anumayatimona kayone yama¹amo¹a tamakayaene hanesie hu¹na nehue.

Nago¹a vea¹mo¹ya avo kae¹ya “Felugae.” hu¹ya Lomu veafe hu falu fala hune¹amatae.

²¹ Nagai¹ene ali¹ya ne¹alia kanoa, Timoti¹a, huno falu fala hulamate. Ani¹a hu¹ya Lusiusi¹ma Yesoni¹ma Sosipata¹ma nagai¹ni Isaleli nofi nafu¹naga¹ya “Mainafio?” hu¹ya hu falu fala hulamate.

²² Nagaya Tetiusi¹na Polo avayafiti ke ali¹na mani avona kae¹na Anumayamo agile “Felugae.” hu¹na hu falu fala hunelamateo.

23-24 Kaiyusi'a "Felugae." huno hu falu fala hunelamate. Noma'afina kanale'ya huno ya-gainatege'na mainoge'ya Yisasi anaga'mo'ya Anumayamo kema havisaya yafena agai nopina melitalu humainae. Elasatusi'a ani kuma'alate Kamanimo kusi kusi kanoene Kavotusi'a tafu-tagana'ene "Felugae." hu'ana hu falu fala hunelamata'e.

Tagaya Anumaya Koti agi alisaga hisune.

25-26 Anumaya Koti agia tusiya huta alisaga higetao. Yisasi'ma hulatenea kanale mono kema hu-hale'na nelamamua keleti Anumaya Koti'a hetitama tokiya waitama maisaya tokiya tamami-gahie. Mani kea hagoteno aya'aya kanagefa falakino haneanagino menia Anumaya Koti'a ago alino falote humalene. Anumaya Koti'a maige maige nehia kanomo'a mage huno hu-maine "Mani kea hufalote hiho." huno hu-mainea ke amaune vaya'mo'ya kae-malenaya kefiti "Muki'a alu nofi vea'mogamina hamapais-age'ya havite'ya amakupi male'ya amametiti hu'ya nagaila nahaisia kava hisae." huno hu-maineane.

27 Anumaya Koti'a nagoke'mo muki'a kanale havi havi'ya'ami hanea veala amakase-mainea kano maineafe Yisasi Kalaisi'a hulateneafene huta agola muki'a kanafina agia alisaga hisune. Tamage.

Ke'nia male ha'no hie.
Nagai'ni nagia Polo'nae.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 21 Feb 2024 from source files dated 31 Aug 2023

55807fd5-1005-5405-89da-5533a7950c65